





西江志卷第七十七

人物 十二

吉安府 三

明

羅復仁吉水人少嗜學通天文書陳友諒辟為翰林院編修  
 已而遁去太祖取九江復仁來謁留置左右從破友諒於  
 鄱陽齎蠟書諭降江西未下諸郡從圍武昌太祖欲招陳  
 理降以復仁故友諒臣也遣入城諭理復仁至城下號慟  
 者竟日理繼使入見持理哭哭止問故乃以太祖意諭之  
 因語理曰大兵所向摧拉枯朽不降且屠城中民何罪理  
 善其言即率官屬出降已復使擴廓前使多拘留復仁議  
 論慷慨獨還擢編修會安南侵占城命復仁齎詔至安南





西江志 卷七十一  
使歸所侵地其王既奉詔贈遺復仁金貝及他土物甚衆  
悉却不受帝聞而賢之洪武三年置弘文館以復仁爲學  
士在帝前率意陳得失嘗操南音帝顧喜其質直呼爲老  
實羅而不名間幸其舍負郭窮巷復仁方墜壁急呼其妻  
抱杙以坐帝帝曰賢士豈宜居此遂賜第城中尋乞致仕  
陛辭賜大布衣題詩襟上褒美之已又召至京師奏減江  
西秋糧及兵餉帝皆許之留三月賜玉帶鐵拄杖裘馬遣  
還鄉以壽終 明史藁

按解大紳所撰弘文館學士羅公傳稱其平生深于易  
尤善爲詞賦在翰林有玉堂倡和藁

劉崧字子高泰和人舊名楚元末舉於鄉國初改名崧洪武  
三年舉經明行修召見授兵部郎中遷北平副使以廉慎

爲先輕刑省事招集流亡民咸復業創立文天祥祠於學  
宮之側請減僻地驛馬以益宛平帝可其奏坐事爲胡惟  
庸所謫輸作京師尋放歸十三年惟庸誅徵拜禮部侍郎  
未幾攝吏部尚書雷震謹身殿詔羣臣陳得失崧以修德  
行仁對尋致仕歸踰年與前刑部尚書李敬並徵拜敬國  
子祭酒而崧爲司業賜鞍馬令朝夕見見輒燕語移時未  
旬日卒無一語及家事帝命有司治殯殮親爲文祭之崧  
博學有志行微時兄弟三人共居一茅屋有田五十畝及  
貴無所增益十年一布被鼠傷始易之居官未嘗以家累  
自隨之任北平攜一童往至則遣還晡時吏退孤燈賦詩  
往往達旦豫章人宗其詩爲西江派福王時追贈禮部左  
侍郎諡恭介 同上



西江志 卷七十七 二  
按吾學編劉祭酒傳稱其致仕歸學問之功老而彌篤云云考子高卒時年甫六十一初被謫歸年猶未滿五十家居久之復起為司業旬日而歿于位官非祭酒亦非老而致仕者也今從史傳又按子高所著有職方集槎翁集行于世尚有北平集及家藏詩文十八卷史傳皆不載

曾萬中吉水人元季為千戶長江右大亂萬中與弟粹中保障鄉里歸明還守吉安授萬中江省叅知政事弟粹中親軍指揮使後城陷兄弟皆戰死 吉州人文紀略

李繼先廬陵人以太智受知太祖任樞密判官南昌降將祝宗等復叛陳友諒悉兵圍南昌城日危促繼先出戰援絕被獲不屈死之贈隴西郡侯祀南昌忠臣廟中 林志

王沂字子與泰和人父以道元時有隱德不仕沂與弟佑俱試有司不合即棄去洪武初佑舉明經除監察御史明年沂亦徵為說書既至上書論事授福建鹽運副使以老辭歸所著有二妙集永樂中同里蕭翬刊行于世 梁泊庵集

按贛州新志引羅念庵集以沂為雩都人者譌

王佑字子啟泰和人與胡子祺同時為廣西僉事按察使尋適嘗咨兩人以政體子祺曰刑新國用輕典宜靜以涖之佑曰蠻方之人瀆倫傷化不及此時明禮法示勸懲後難治適從之廣西稱治蜀平佑徙知重慶州招徠撫輯甚得民和坐事免官卒 明史藁

按子與兄弟皆未仕元人物志以兄沂為明人弟佑為元人今據史傳及梁用之所撰竹亭行狀改正又按二



妙集之外子與有竹亭集子啟有長江萬里集

楊卓字自立泰和人洪武進士授吏部主事踰年遷廣東行省員外郎田家婦行山中遇雨伐木卒欲亂之婦不從遂殺婦婦家得屍訴參政拷同役者二十人皆引服吏抱具獄請署卓曰殺一婦安用二十卒乎列二十人庭下熟視久之指兩卒曰殺人者汝也兩卒大驚服罪參政曰員外何以知之卓曰卒二十必善惡異也二十人遇一婦亂且不能況殺之乎參政曰善遂生十八人坐事謫鳳陽屯種名為禮部主事改杭州通判卓未至杭時有兄弟爭田累歲不決卓至垂涕不欲訊兄竟讓弟田卓精吏事吏不能欺而為治尚寬恕民悅服焉病免卒 同上

劉夏字簡卿安福人洪武改元上書撰大學旨要進呈時大

早應詔言二事稱旨差往汴陝訪採前代政績筆削成書

以獻二年復差往交趾竣事没于南寧 林志

按林志作劉迪簡登科考迪簡乃洪武三十年進士吉

水人今從安志改作夏

歐陽韶字子韶永新人洪武初授監察御史時太祖威斷莫測日命御史二人侍班刑賞有失中不諫正者罪之一日子韶侍班上乘怒將戮一人他御史不敢前子韶趨跪闕庭倉卒不能措辭舉手加額連呼曰陛下不可上察其樸實天顏為霽其人得從輕典後乞致仕終于家 人物志

尹堅字潮春永新人常開平伐江西堅知天命有歸說熊天瑞以全城歸服擢授直殿將軍後累從征伐有功洪武二年改授武略將軍祥符衛鎮撫予世襲 林志



錢瑛字可大吉水人祖本和以篤行稱瑛生八月而孤元末  
大亂奉祖及母避難歷五六年最後遇賊縛本和瑛奔救  
并縛之本和哀告賞其孫瑛亦泣請代不已賊憐而兩釋  
之方是時其母被執而妻張氏從伏莽中窺見即趨出謂  
賊曰姑老請釋而縛我賊見其年少從之既就縛擲袖中  
鞵與姑訣曰婦無用此矣且行且睨姑稍遠即罵賊不肯  
行賊持之急罵益厲賊怒攢刃刺殺之事定有司知瑛賢  
凡三薦並以親老辭子遂志中進士官山東僉事明史藁  
梁伯興永豐人洪武初以明經舉除真定府同知善政著聞  
陞應天府丞改知梧州府後召至京查理刑科事嘗命撰  
日本國詔稱旨陞河南右布政使明一統志  
李亨字觀泰吉水人洪武初以人才舉官蘇州知府有政聲

以父憂去位太祖遣使齎勅諭之有古廉潔之褒賜米五十石鈔二百五十錠為守服之用林志

艾彭字伯崇吉水人洪武初以儒士授潮州同知擢東昌知府潮人感其惠愛嘗立主侑祀于韓公廟守東昌築堤捍江自黑龍渦至魏家灣六十里民獲安居焉同上

劉穀字原實龍泉人洪武初以教授被徵入見是日有星象文明之祥除監察御史屢上封事皆見納以疾去位後出補無為知州除水面錢均夫差門無私謁同上

彭京字伯圻安福人洪武初以薦辟任給事中陞真定知府有政聲令忌其嚴誣以私疏上察其冤坐令以死調京為河南僉事善草書得懷素筆法同上

陳灌字子將廬陵人生數歲而孤既冠覩元綱日壞去習兵



法已而寇盜蜂起遂募義勇保障一鄉陳友諒將熊天錫  
強禮致灌與俱至九江灌視陳氏不足與有為去之甲辰  
春太祖克武昌灌因弘文館學士羅復仁詣軍門上謁遂  
擢湖廣行中省員外郎大將軍徐達北征灌贊軍事既克  
泰州留灌築城不旬日告竣除寧國知府百廢具舉革兼  
併之俗覈欺隱之籍朝廷取其戶帖頒行天下築化城等  
十六圩隄伐巨石作水門以時蓄洩三年代去謁告歸省  
卒

楊東里集

按陳灌林志作瓘今從明史改正又采楊東里墓碑補  
撰周文襄集中陳太守傳略同

曾鼎字元友泰和人祖懷可父思立並有學行元末鼎奉母  
避賊母被執鼎跪而泣代賊怒將殺母鼎號泣以身翼蔽

傷頂肩及足控母不舍賊魁繼至憫之攜其母子入營療  
治獲愈釋之行省聞其賢辟為濂溪書院山長洪武三年  
知縣郝思讓辟教社學居久之卒

明史藁

按曾鼎明史無專傳附見錢瑛傳後志書失載今增入  
陳繼先字仲述泰和人洪武進士授御史時決獄者多弗稱  
上指獨繼先所訊得情憲臺章疏奏覈皆出其手暇輒為  
文自娛一時稱為陳古文而不名惜其文散失存者五卷  
耳尋沒于官

梁泊庵集

按陳繼先林志所載不詳今采梁用之所撰行狀改補  
所著名橋梓前集

蕭執字子所泰和人洪武四年鄉舉為國子學錄五年夏至  
帝有事北郊召尚書吳琳主事宋濂率文學士以從執偕



陶凱等十二人見帝齋所令賦詩親第甲乙復令賦山樞  
花閱執詩喜遍示諸臣時帝留意文學往往親試廷臣執  
與陳觀知遇尤異以親老乞歸親歿廬墓側申國公鄧鎮  
勦龍泉寇蔓及泰和執往責之鎮爲禁止邑人以安明史  
藁

周子諒名愷以字行廬陵人洪武初進士預修禮書授工部  
主事與贛州劉承直同時並用有詩文集二卷吉州人文

紀略

吳勤字孟勤師尹子元季盜起勤以策干吉安守臣不見用  
洪武初爲武昌教授永樂初召入史館修高廟實錄號良  
史才書成改開封教授周定王敬禮之未幾卒年七十六  
勤學該博手未嘗釋卷爲詩文敏而工尤善行草書在史

館時七十餘矣運筆如飛初號匡山樵者更號由翁皆以  
名其文集并六藝集凡若干卷同上

羅性字子理泰和人博學有行誼洪武初舉於鄉授德安同  
知大盜糟李萬戶者捕久不獲株連繫獄者數百人性至  
郡有指糟李死者性辯其非是笞逐之悉出所繫與期十  
日得糟李即盡貸若曹衆叩頭願盡力七日果得糟李嘗  
治蔬圃得窖鐵萬餘斤會方賦鐵造軍器民爭求售性曰  
此天所以濟民也悉以充賦秩滿赴京坐擅用棗水染軍  
衣謫戍西安四方老師宿儒在西安者數十人吳人鄒奕  
曰合吾輩所讀書庶幾羅先生之半年七十卒明史藁  
按羅子理爲西楊受業師生平行誼詳見文貞所撰本  
傳中今從史



胡子祺名壽昌以字行吉水人宋資政殿學士銓十世孫洪武三年選文學士十八人授監察御史子祺與焉尋遷廣西按察司僉事屢平冤獄祠廟不載祀典者悉撤毀改知彭州都江諸堰秦守李冰所鑿導江水灌成都田歷代皆用鐵石修之勞費不貲元季兵興堰廢田不治子祺議以竹木代工甚省遷延平知府踰年卒次子廣自有傳同上周肅吉水人洪武初舉授御史臺都事直諫稱旨受文綺楮幣之賚累官戶部尚書經畫悉當上甚器重之林志

張衡字子平萬安人洪武進士授禮科給事中疏奏剴切擢禮部左侍郎奏正洪武禮儀定式歲行郊祀選百官行最者十三人登壇分獻衡與焉太祖屢嘉其清慎以其事載大誥每宣召輒呼為瘦張而不名同上

劉煥字孟章吉水人洪武初以明經舉知原武縣上書首陳時務禁民掘冢時適祭無祀鬼神有犬搖尾而前叱逐不去乃命左右隨之至蒿野中見二人掘冢獲而訊之伏罪後以薦擢吏部郎中人物志

艾實字用濟吉水人洪武初應制進太學賦稱旨授周府長史懇辭還鄉治別業于符山下著有邯鄲集稽古錄安志周靜安福人洪武初舉學行授鈔庫提舉以伉直謫戍畢節居夸十八年益厲節操適詔選老成人諭榜葛刺國起授行人持節往淹留七載始遣陪臣伴歸至潮陽卒所著有滇南集同上

伍朝賓字介貞安福人洪武初以遺逸徵試惟天生民有欲論敷對稱旨令供奉翰林文字除國子助教弟朝作亦有



詩名 同上

尹平字伯洪吉水人洪武中驛召至京授考功監丞改刑科都給事中又改御史彈劾不避權貴奉命巡視湖廣詢察民隱考覈官吏所至風采卓然後以忤旨下獄卒 林志  
歐陽銘字日新泰和人以賢才薦除江都縣丞兵燹之餘民死徙十七八銘招徠拊循漸次復業民有繼母告其子不孝者呼至案前委曲開譬母子泣謝去遷知臨淄縣副將軍常遇春過臨淄卒入民家取酒相毆擊一市盡誦銘笞而遣之卒訴令罵將軍將軍召詰之銘曰卒王師民亦王民也民毆且死卒不當笞邪將軍意解為責軍士以謝已而大將軍徐達至軍士相戒曰是嘗抗常公健吏也毋犯銘為治廉靜平恕暇輒進諸生講文藝或單騎行田間視

民耕獲勤惰勸勵之邑大治秩滿入覲卒

明史藁

按歐陽銘林志失載王文端公集亦有傳與史略同

劉亨字嘉會廬陵人洪武中舉經明行修說書於華蓋殿以言事忤執政出為壽州訓導嘗上言文武並用之道升武進縣丞縣民李德懋等作亂亨謀於守令擒首惡戮之而諭降其黨事聞賚金幣旋以事罷歸宣德中復以薦入朝自言年將八十不足任事聽還鄉自便又數年卒所著有竹軒寫心二集隨寓錄凡若干卷 王柳庵集

劉于字允恭永豐人幼嗜學年稍長以文謁虞文靖公集深器之至正七年舉於鄉以下第恩例署泰和州學正秩滿還鄉明洪武初再徵至京師歷考福建廣東鄉試得士為多嘗召見敷繹經傳上為首肯欲授以州邑之職年老固



西江志 卷七十一

宋學士集

九

伍洪字伯宏安福人洪武進士授績溪主簿擢上元知縣丁外艱服闋以母老須養不復仕推資產與諸弟而已獨隱居養母十九年有異母弟得罪而逃使者捕弗獲執其母洪哭訴求代母曰汝往必死莫若吾自當之洪曰安有子在而累母者使者執以行竟死於市 明史藁

阮友彰廬陵人洪武初官福建按察使以廉幹稱左遷河南尋謫戍復起為交趾副使交趾久違聲教甫內屬友彰至未三月政令大行 林志

劉仕貍字伯貞安福人父開開兄聞弟閱閨皆以春秋應舉為元官獨開不仕著書終其身仕貍少受父學紅巾亂避地邑南社州洪武十五年應賢良舉授廣東按察司僉事

分司瓊州州在海外民夷錯居俗獷悍不可繩以法且善蠱上官至輒致所產珍貨為贄受則喜以為無猜嫌不受則懼禍蠱殺之仕瓊者悉為所汙仕貍廉且惠愛輕徭理枉大得民和雖卻其贄夷人不忍害也朝議省僉事官改授東莞河泊使發憤得疾遭風歿於水 明史藁

按劉仕貍林志不載今采史傳增入據正氣錄所載有悠然集十卷

蕭岐字尚仁泰和人五歲而孤事祖父母以孝聞有司屢舉不赴洪武十七年詔徵賢良強起之上十便書萬餘言時帝刑罰過中訐告風稍熾岐請禁止實封以杜誣罔依律科獄以信詔令語皆指切名見授潭府長史力辭忤旨謫雲南楚雄訓導岐即日行遣騎追還歲餘改授平涼再歲



致仕復召與錢宰等考定書傳賜幣鈔給驛歸嘗輯五經要義又取刑統八韻賦引律令為之解合為一集嘗曰天下理本一出乎道必入乎刑吾合二書使觀者有所省也學者稱正固先生子忠幼被掠臨洮百戶何氏收為壻岐自平涼歸遇於道攜還家其後遂為顯族 同上

按蕭岐明史無專傳附見桂良彥傳後

陳謨字一德泰和人幼能詩文邃于經學旁及子史百家涉流探源辨析純駁犁然歸于至當隱居不求仕而究心經世之務嘗謂學必敦本莫加于性莫重于倫莫先于變化氣質若禮樂刑政錢穀兵甲度數之詳亦不可不講習一時經生學子多從之游洪武初徵詣京師賜坐議禮學士宋濂待制王禕請留為國學師謨引疾辭歸屢應聘為江

淵考試官著書教授以終 同上

按陳謨卒時年九十六所著有書經會通詩經演說及

### 海桑集

余斯延泰和人自少力學從元進士劉雲章授書洪武初徵至京師以老病告歸長子學夔永樂二年進士所居名果確齋梁用之潛為記 梁泊庵集

梁蘭字庭秀泰和人贊善潛之父有樂畦先生集鄒仲熙稱之云隱居樂道其詩沖淡閒雅有自得之致 同上

劉季道吉水人洪武中為起居注首發御史大夫陳寧奸狀嘗侍東宮閱書東宮方視楊太真畫像季道手裂之隨駕幸中都上賦清流關詩命和季道援筆立就有治定不教生縱逸功成猶遣歷間關之句上嘆賞曰此詩有安不忘



危之意賜白金文綺陞浙江按察司僉事發擿陰伏機敏如神尋以剛直忤權貴下獄死

林志

王伯貞泰和人以經術顯洪武十五年聘至京師應詔者五百餘人帝親御奉天門試之伯貞對第一授試僉事分巡廣東雷州復呂塘廢渠清鹽法會罷分巡官召還為戶部主事命尚書趙俊受學以父喪服闋不時起謫居安慶者數年建文初復以薦知瓊州府崖州黎相仇殺以反聞且用兵伯貞捕其首惡數人兵遂罷瓊田歲常三穫以賦軍軍不時受俟民乏而斂急則因之以要利伯貞為立期三輸之而弊絕居數年大治流民來歸者萬三千餘口憂歸補肇慶未之官卒

明史藁

黃鼎字玉鉉吉水人修辭立言必以道德仁義為本胡廣鄒

緝皆其門人所著有四書五經精義

同上

楊偉字季真永新人性狷介博通五經尤精天文地理之學嘗取尺紙作廣輪圖山川曲折郡邑遠近如指諸掌

同上

楊引吉水人好學能詩文為宋濂陶安所稱駙馬都尉陸賢從受學入朝舉止端雅太祖喜問誰教者以引對立召見賜食他日賢以褻服見引太息曰是其心易我不可久居此矣即引去時方不次用人有司頻以孝廉文學善書薦皆不赴復以纂修徵亦不就其教學者先操履而後文藝嘗揭論語鄉黨篇示人曰吾教自有養生術安事偃仰吐納為迄老視聽不衰既歿安福劉球稱其學探道原文範後世去就出處卓然有徐穉陶潛之風

明史藁

周桀一作矩字仲方洪武進士為翰林侍從事必師古出為



西江志 卷七十一  
中牟令有異政遷台州同知謫于戎伍廬陵李昌祺自陳有志經學願得槩為師起為廬陵司訓夏原吉薦同治水蘇松磚石不給槩命拆塙為之中有碑云此塙逢周破以經義治水有聲 林志

劉伯完字觀靜吉水人洪武初舉茂才通占卜課候術數之學里中何監正奇其技薦于御史臺劉璉值朝廷雅重天文諸儒詔授陰陽學正歷欽天監兼回回監副迨靖難兵起遂變姓名遠遁後不知其所終 人物志

周鳴字岐鳳吉水人洪武中以經明行修薦為桐城訓導改即墨簿會軍興賦鐵七十餘萬鳴具言海隅非產鐵之地民力用甦永樂初授國子學正擢漢府紀善王素蓄不臣之心開寶賢堂招致匪人為奪嫡計鳴心知之作寶賢堂

箴寓規意王忌之送鳴于京師下錦衣獄仁宗時以太子監國知其以諫得罪改長洲儒學陞國子博士仕終職方員外郎 分省人物考

宋禮字大本永寧人洪武中以國子監生擢山西按察司僉事左遷戶部主事署禮部事以敏練擢禮部右侍郎進工部尚書命開會通河發山東及徐州應天鎮江民三十萬蠲租一百十萬二千石有奇二十旬而河成初禮以會通之源必資汶水乃用汶上老人白英策築堽城及戴村壩橫亘五里遏汶流使無南入洸而北歸海滙諸泉之水盡出汶上至南旺中分之為二道南流接徐沛十之四北流達臨清十之六又相地置閘以時蓄洩自分水北至臨清地降九十尺置閘十有七而達於衛南至沽頭地降百十



有六尺閘二十有一而達於淮又奏濬沙河入馬常泊以益汶是年興安伯徐亨工部侍郎蔣廷瓚濬祥符魚王口至中藥下復舊黃河道命禮兼董之還京論漕渠功禮第一已而平江伯陳瑄治江淮間諸河功亦相繼成於是河運大便利漕粟溢多遂罷海運禮性剛馭下嚴急故易集事然亦不為人所親卒之日家無餘財弘治中主事王寵始請立祠祀之南旺湖上

明史藁

鄒瑾魏勉俱永豐人洪武末瑾以薦辟歷陞大理寺丞掌御史事勉為瑾之甥同官御史靖難兵至城與十八人同謀死守時都督徐增壽謀開門迎納十八人即殿前毆之幾死帝輟朝瑾與勉大呼曰願速加誅臣等義不與之俱生不聽次日宮中自焚走或曰宜急迎附瑾與勉不從皆死

之南渡後贈瑾大理卿諡貞烈人稱永豐二烈 吉州人文紀略

按明史魏勉作冕與吉州人文紀及林志小異且止立魏傳而不及鄒今補入魏勉後亦予諡俟再考

曹居真廬陵人著詩義發揮行于世今多採入詩經大全學者宗之 林志

藍子真吉水人洪武中試天下第一歷官副都御史以直聲聞于時 人物志

劉埜字子彥泰和人子高弟洪武中徵制禮作樂通今博古之士贛守舉埜以應條奏十事禮樂多所更定 林志

夏霖字道存吉水人洪武間以文學徵為本郡教授博學有行誼沒配祀九賢堂有荷亭金灘等集存于家 人物志



黃九衢字伯路吉水人博學多才識所製渾天儀刻漏壺曲盡其巧為本縣訓導守令每造請問以禮樂原委九衢一折衷皆可施行同上

郭餘字慶宜泰和人洪武間徵論道之士應詔授廣東按察僉事有禹貢傳註詳節行于世林志

鄒朴字爾愚永豐人以儒官仕周府直言諫王以止其非謀王不聽禁錮甚密後謀逆事覺大臣以朴諫語聞上嘉其忠特陞為監察御史尋陞秦府長史歸省聞瑾死靖難之節憤激不食而卒同上

曾鳳韶廬陵人洪武進士建文初為監察御史燕王入覲馳御道入且不拜鳳韶侍班劾大不敬以至親不問燕兵起朝議遣使持詔往諭鳳韶慷慨請行比至燕抗不納乃還

燕王稱帝以御史召不赴尋加侍郎召又不赴乃刺血書衣襟曰予生廬陵忠節之邦素負剛鯁之腸讀書登進士第仕宦至繡衣郎慨一死之得宜可以含笑於地下而不愧吾文天祥囑其妻李氏子公望勿易我衣即以此殮遂自殺年二十九李亦自經死福王時贈太僕卿諡忠毅妻

諡貞愍明史藁

梁潛字用之泰和人洪武間舉鄉試授四川蒼溪訓導以薦除廣東四會知縣縣有龍橋河吏廉平則河水清自潛至迄去水可鑑永樂元年召修太祖實錄書成擢翰林修撰賜白金襲衣文幣兼右春坊右贊善代鄭賜總裁永樂大典同上

按梁潛榜姓鍾後復本姓為梁人物志既載梁潛又載



鍾潛今據史傳存其一又按仁宗爲太子監國時潛居  
輔導後以讒死此段史傳失載所著有泊庵集

蕭翀字鵬舉以字行泰和人洪武辛酉以賢良應制賦指佞  
草詩稱旨授蘇州同知山東鹽運副使以勤儉廉介稱爲  
劉子高弟子編其師集者也後以子鎡貴贈太子太師林  
志

按蕭翀事林志與人物志略同皆不及其兄弟而劉子  
高職方集所撰五荆傳則稱其同祖五人長曰翀次翹  
次翬次翬次暉一門孝友致紫荆五幹之瑞顧不及翀  
之宦蹟豈同時同邑別有同姓同名者乎抑或一人而  
彼此所述各異辭乎今據林志立傳劉文載藝文中

朱如初萬安人辟舉不就家有喪排斥異端一遵家禮洪武

間西境寇發官兵圍寇境畫地圖頗干無辜如初白縣令  
當區別善惡或曰圖成難改如初號哭碎首曰畫地之功  
與萬安人之命孰重輕令遂改圖良民幸免同上

王省字子職吉水人洪武鄉舉至京命吏部授官省言親老  
乞歸養尋以文學徵太祖親試稱旨當殊擢自陳才薄親  
老乞便養授浮梁教諭凡三爲教官最後得濟陽燕兵至  
省坐明倫堂伐鼓聚諸生謂曰若等知此堂何名今日君  
臣之義何如因大哭諸生亦哭省以頭觸柱死女靜適即  
墨簿周岐鳳聞燕兵至濟謂父必死三遣人往訪竟得遺  
骸歸葬福王時贈禮部員外郎諡貞烈明史藁

按王省事詳見金文靖幼孜所撰墓志中末謂濟陽失  
守省閉門不食數日而死與史小異吉州人文紀略云



省子禎為夔州通判亦抗節死攷墓志省三子曰喆曰善曰茲永初無名禎者

解縉字大紳吉水人父開與弟闔有名稱二解縉年十九舉鄉試第一洪武二十一年與兄綸同舉進士授中書庶吉士改御史時詔近臣父皆得入覲縉父開至帝召謂曰大器晚成若以而子歸益令進學後十年來用未晚也成祖入京擢侍讀命與黃淮楊士奇胡廣金幼孜楊榮胡儼七人並直文淵閣預機務尋進侍讀學士賜五品服命七人命婦朝中宮縉等妻遂謁后於柔儀殿賜冠服鈔幣而出永樂二年立皇太子進縉翰林學士兼右春坊大學士縉少登朝才高任事直前好臧否鯁直無顧忌廷臣多害其寵而定建儲議忤漢王卒以此敗同上

江盈科曰仁廟為皇長子南京監國最久高煦百計中傷之文皇殊無憐愛意一日宮中出虎顧諸彪圖命縉題其上縉題云虎為百獸君誰敢觸其怒惟有父子情一步一回顧上覽詩惻然動念即日命夏原吉迎皇長子于南京始見歡洽噫高煦以功結于上上意業已有屬此殆難以口舌爭者而縉以題虎一詩激發成廟之真心于離間之後又以好太孫一言堅定成廟之長慮于猶豫之時震位以寧大寶遂定雖其後竟以譴謫死而功在社稷九原瞑目矣按解所著名春雨堂集

陳誠字子魯吉水人洪武進士初授行人司出使安南却其餽送銀幣復命陞翰林院檢討建文朝出為廣東叅議永樂初謫居撫州踰年起為吏部主事晉員外郎時西域撒



馬兒罕哈烈等國皆遣使入貢命誠往報凡所涉歷錄爲西域志使還上之陞本司郎中累官布政使叅政凡三使西番皆不辱命洪熙中以老告歸所著有竹山集竹山自記

按陳誠事蹟林志及吉州人文紀皆不詳今改撰

宋琮泰和人洪武三十年會試第一北士無預者琮善易學悵然語人曰翰苑當有厄吾其竄乎既而諸生上言劉三吾白信蹈等南人私其鄉帝怒命侍講張信等覆閱不稱旨有言信等故以陋卷呈由三吾等屬之也帝益怒信蹈等論死三吾以老戍邊琮亦遣戍帝親策問更試擢六十一人皆北士時謂之南北榜又曰春夏榜云永樂初赦還起刑部檢校鄉人楊士奇輩貴顯琮無所攀援宣德中以

檢討掌助教事卒之前預尅死期或叩以休咎不應明史

藁

鄧時俊字仲清永豐人洪武進士任刑科給事中以直諫出

爲驛丞者再後入預修大典陞主事卒林志

尹昌隆字彥謙泰和人洪武中進士及第授修撰改監察御史建文元年京師地震昌隆疏言奸人專政陰盛陽微謫見於天執政大怒斥爲福寧知縣燕兵南下昌隆上書言今事勢日去然北來奏章動引周公輔成王不若罷兵息戰許其入朝彼旣欲伸大義於天下不應便相違戾設有蹉跌便須舉位讓之猶不失作藩王若沈吟不斷禍至無日進退失據雖欲求爲丹徒布衣不可得矣不報永樂二年授禮部主事初帝欲立高煦爲太子金忠力爭帝以問



昌隆昌隆以忠言為是帝不能奪而心銜之乃逮昌隆下獄尋遇赦復官後數年谷王謀反事發辭連昌隆為呂震所誣獄具置極刑死夷其族

明史藁

曾麟字子貞廬陵人洪武中以薦授靖安訓導考滿入朝除周府紀善以忠直事王世子以下皆敬憚之號為直素先生王以罪被逮麟深自慝至丹陽遂自殺世以賈誼死梁事比之後與同宗侍御鳳韶並祀于二忠祠

林志

鄒緝字仲熙吉水人洪武中舉明經授星子教諭建文時入為國子助教成祖即位擢翰林侍講立東宮兼左中允屢署國子監事進左庶子兼侍講永樂十九年三殿災詔求直言緝上疏大略言國家所恃以久長者惟天命人心而天命常視人心為去留今天意如此不宜勞民當還都南

京奉謁陵廟告以災變之故保養聖躬休息於無為毋聽小人言復有所興作以誤於其後也書奏不省時侍讀李時勉侍講羅汝敬俱下獄御史何忠羅通鄭維桓徐瑤給事中柯暹俱左官交趾惟緝與主事高公望庶吉士楊復得免罪緝博極羣書居官勤慎清操如寒士

同上

按史傳載緝所上一疏累千餘言文多不具錄林志所載與史不同今從史所著有素庵集

周是修名德以字行泰和人洪武末舉明經為霍丘訓導太祖問家居何為對曰教人子弟孝弟力田太祖喜擢周府奉祀正改衡府紀善留京師預翰林纂修燕兵渡淮與蕭用道上書指斥用事京城失守宮中火發留書別友人江仲隆解縉胡靖蕭用道楊士奇付以後事具衣冠為贊繫



衣帶間入應天府學拜先師畢自經於尊經閣年四十九  
萬曆中督學御史饒位立祠祀之初與士奇縉靖幼孜黃  
淮胡儼約同死惟是修不負其言後士奇為作傳明史藁

按人物志是修所著有詩集義論語類編廣衍太極圖  
邇言家訓觀感錄芻蕘集進思集綱常懿範等書今傳  
者惟芻蕘集

王處敬廬陵人少貧篤志于學洪武中官至湖廣僉事謫交  
趾尋復原職平生剛毅與人不苟合至老不渝林志

周召字公明吉安人洪武初被薦為教官召預纂修廷試大  
明一統賦稱旨擢第一有溪園集同上

劉子敏名祿泰和人洪武間拜監察御史歷官廣東副使有  
學識鯁亮無阿百折不挫人物志

曾克偉泰和人由進士任刑部主事嘗同御史按治福建政

肅民安特被獎賚進山東僉事分巡遼東林志

蕭用道泰和人建文中舉懷才抱德詣闕試文章擢靖江王  
府長史召入翰林修類要燕師渡淮與周是修同上書指

斥用事者永樂初預修太祖實錄改右長史從王之藩桂  
林作端禮體仁遵義廣智四門箴以獻後以疾乞歸明史

藁

羅恢字師程永豐人初為崇仁司訓嘗上疏言孔廟從祀當

以有若居十哲位次而宰我居兩廡公伯寮宜斥從祀疏  
奏不報永樂中膺薦入史館纂修太祖實錄陞國子學錄

遷博士以年老致仕所著有歸田錄寫心藁周文襄集

康彥民號恣窗泰和人洪武進士四令壯邑皆著賢聲初宰



青田改儀真巴陵以憂歸服除補天台政尚教化勸民務  
本力農著有諭士民書萬餘言未幾告歸家居十年宣德  
初巡按御史至天台邑民言彥民公廉有為乞復召為縣  
御史以聞遂再涖台治狀為浙第一中蜚語謫江寧丞卒  
諸縣各祠名宦 豫章書

楊士奇名寓以字行泰和人建文初以史才薦遂入翰林與  
編纂尋命吏部考第史館諸儒尚書張統得士奇策曰此  
非經生言也奏第一成祖即位改編修已簡入內閣典機  
務帝北巡士奇留輔太子從容規勸太子喜文辭贊善王  
汝玉以詩法進士奇曰殿下聽治暇當留意六經否則兩  
漢詔令可觀雕蟲小技不足效也太子稱善駕還南京召  
士奇問監國狀士奇以孝敬對明年帝北征士奇仍留輔

太子漢王譖太子益急帝頗信之會太子所使迎帝者緩  
且奏書失辭遂下侍讀黃淮獄士奇後至帝宥之居數日  
帝已盡得漢王事削兩護衛進士奇翰林學士兼故官留  
輔如故明年坐輔導有闕繫錦衣獄旬日而釋又明年帝  
崩於軍梓宮至太子發喪即位擢士奇禮部侍郎兼華蓋  
殿大學士尋進少保與同官楊榮金幼孜並賜銀章得密  
封言事宣宗即位修仁宗實錄士奇等為總裁宣德元年  
漢王反帝親征破擒之師還次單橋侍郎陳山迎謁因請  
乘勝襲彰德執趙王士奇曰太宗皇帝惟三子今上惟兩  
叔父有罪者不可赦其無罪者厚待之疑則嚴防之使無  
虞而已何遽加兵傷皇祖在天意乎時惟楊溥與士奇合  
帝曰吾欲封羣臣章示王令自處何如士奇曰善更得一



西江志 卷七十一  
三  
璽書幸甚於是發使奉書至趙趙王得書大喜泣曰吾生  
矣即上表謝且獻護衛言者頓息帝嘗微行夜幸士奇宅  
士奇倉皇出迎頓首曰陛下奈何以社稷宗廟之身自輕  
又數日果獲二盜有異謀帝召士奇告之故且曰今而後  
知卿之愛朕也帝初即位內閣臣七人陳山張瑛以東宮  
舊恩入不稱出爲他官黃淮以老致仕已而金幼孜卒惟  
士奇榮溥三人在宣德十年帝崩皇太子方九齡內庭頗  
有異議士奇榮與英公輔入臨退請見太子於文華殿頓  
首呼萬歲羣臣皆賀浮言乃止正統初朝政清明中外臣  
民翕然皆稱三楊以居第目士奇曰西楊榮曰東楊而溥  
嘗自書郡望曰南郡因目爲南楊三年士奇進少師歸省  
墓未幾還以老疾在告卒年八十贈太師謚文貞

明史藁

按西楊所著有東里文集續編

胡廣字光大吉水人子祺子建文二年廷試第一更名靖授  
翰林修撰成祖即位廣偕解縉迎附擢侍講復名廣遷右  
庶子兼左春坊大學士尋拜文淵閣大學士帝北征廣與  
楊榮金幼孜從廣善書每勒石皆令書之禮部郎中周訥  
請封禪廣言其不可遂止丁母憂召還帝問百姓安否廣  
對曰安但郡縣窮治建文諸臣株及支親爲厲詔悉罷之  
永樂十六年卒年四十九贈禮部尚書謚文穆仁宗即位  
官其子種爲翰林檢討加贈廣少師文臣得謚自廣始

同上

王艮字敬止吉水人建文二年進士對策第一貌寢易胡靖  
艮次之又次李貫三人皆同里並授翰林院修撰如洪武



中故事設文史館居之預修太祖實錄總集類要時政記類次祕閣書目諸大著作皆綜理之燕兵薄京城良與妻子訣曰食人之祿者死人之事吾不可復生矣時解縉吳溥亦良鄉人與良及胡靖鄰居皆集溥舍縉陳說大義靖亦奮激慷慨良獨流涕不言溥曰三子受知最深事在頃刻若溥固可從容三子去溥子與弼尚幼嘆曰胡叔能死節大佳溥曰不然獨王叔死耳語未畢隔牆聞靖呼外喧甚可看豬溥顧與弼曰一豬尚不忍寧自忍乎須臾良舍哭伏鴆死矣同上

按建文二年為庚辰王良以是科及第林志以良為洪武進士蓋緣成祖即位廢建文年號故也今從史傳

顏伯瑋名瓌以字行廬陵人唐魯國公真卿後建文元年以

賢良徵授沛縣知縣李景隆屯德州沛人終歲輓運伯瑋善規畫得不困會設豐沛軍民指揮司乃集民兵五千人築七堡為備禦尋調其兵益山東所存疲弱不任戰燕兵攻沛伯瑋遣縣丞胡先間行至徐州告急援不至遂命其弟珏子有為還家侍父題詩公署壁上誓必死燕兵夜入東門伯瑋冠帶升堂南向拜畢自經死有為不忍去復還見父屍自刎父旁同上

按福王時伯瑋贈太僕少卿諡忠惠有為諡孝節

劉鎬字武性龍泉人父允中廣西憑祥司巡檢没于官其地在廣西窮處與交趾接境鎬以不得歸父骨為恨鄉先生晏彥文知而憐之為言于廣西當事聘為臨桂學導假以公事往憑祥鎬至求之客冢中莫可辨識允中在任時所



養家童劉四者既轉入交趾一夕四忽從墓來若有物憑之者因得其處啟視衣衾宛然又刺血驗之誠是遂負父骨歸葬

分省人物考

張彥方龍泉人建文初由給事中以便養告改樂平知縣靖難兵起南都勤王詔下彥方倡義糾兵有武弁阻之彥方大哭曰君父在水火顧可以自緩乎遂率所部抵江口遇靖難游兵執至樂平梟首暴尸譙樓時暑月經旬顏面如生無一蠅集父老竊葬縣治清白堂後

同上

彭與明萬安人太學生選授兵科給事中陞大理寺丞持風裁喜談兵事會燕師起擇督察諸將帥者衆推與明遂出淮西至靈壁而何福已戰敗與明被執文皇縱歸令傳語中朝士與明裂冠冕棄官變姓名遁去不知所終

人物志

王雅字格非吉水人德化訓導永樂間為會試房考得曾榮等皆知名之士陞司經局正字尋遷翰林檢討預修兩朝實錄性樂恬退未嘗一及貴勢之門

林志

曾榮字子啟吉永豐人永樂二年殿試第一授翰林修撰尋詔解縉選進士二十八人進學文淵閣榮為首司禮監月給筆墨紙光祿給朝暮饌禮部月給膏燭鈔工部擇近第宅居之帝嘗親試天馬海青歌榮援筆立就又嘗摘記載諸隱僻事問榮條對無遺悞由是見褒寵有薦文士者帝必問才學如榮否或命就榮辨論以觀其能修永樂大典為副總裁進侍讀學士修天下郡邑志復為副總裁仁宗立除左春坊大學士宣宗立進少詹事預修三朝實錄再扈北巡三典會試為文如源泉一瀉千里館閣中自解胡



後諸大制作多出其手宣德七年卒於官年六十一贈禮部左侍郎諡襄敏

明史藁

按曾棨所著名巢睫集今傳者惟西墅殘藁二卷有詩而無文

李湘字永懷泰和人永樂中才擢東平知州城東有大村壩源出岱嶽雨潦輒為民患奏發丁夫隄之州及所轄五邑地多荒蕪力督民墾闢公私皆實會舊官還任將解去民羣乞於朝帝從其請時數北征令山東長吏督民轉餉道遠多死亡惟東平人無失所奸人誣湘苛斂民財縣民千三百人走訴巡按御史暨布按二司力白其冤耆老七十人復奔伏闕下發奸人誣陷狀及布政司繫湘入都又有耆老九十人隨湘訟冤通政司以聞下刑曹閱實乃復

湘官抵奸人於法涖州十餘年擢懷慶知府卒

同上

胡直本姓熊字敬方吉水人銳意六經尤致力于關洛之學所著有春秋提綱西澗鍾陵等集以子槩貴贈右都御史

梁泊庵集

周彥奇名正吉水人永樂初授刑科給事中陞雲南僉事會麓川緬甸蠻苗忿爭相仇殺彥奇匹馬深入其地宣布國威諭以禍福皆俛首解去陞大理少卿讞訟能推極幽隱

人物志

周述字崇述吉水人永樂二年與從弟孟簡並舉進士及第帝手題二人策獎賞之並授翰林編修讀書文淵閣述嘗扈北巡累進左春坊諭德仁宗即位命從皇太子謁陵南京宣宗時進左庶子正統初卒官孟簡在翰林二十年始



遷詹事府丞出爲襄王長史有言宜留備顧問者帝曰輔  
朕弟尤勝於輔朕也述温厚簡靜未嘗疾言遽色文章雅  
贍孟簡謙退不伐生平無睚眦於人竝爲世所重云明史

藁

按述所著有東墅集孟簡所著有竹澗集

宋子環字文瑩廬陵人由永樂進士爲庶吉士歷考功郎中  
從師達採木湖廣以寬厚得衆心仁宗即位授梁府右長  
史改越府和易澹泊居兩府皆有賢聲宣德中卒官明史

藁

按子環所著有詞林藁梁園集本傳失載居官三十年  
既卒家具蕭然事聞給舟歸喪詳見人物志

張景良永新人永樂間授國子博士進四書直講授右春坊

司直郎判順慶以東宮嘗授學于景良取府所斂民金五  
百兩遺之景良受焉悉以還前所斂之民或難之曰孰若  
先拒可以博廉名景良謝曰斯皆吾民膏脂也豈忍借是  
以沽廉哉人物志

周忱字恂如吉水人永樂進士選庶吉士成祖擇其中二十  
八人令進學文淵閣應二十八宿忱自陳年少乞預帝嘉  
其有志許之時人謂挨宿尋擢刑部主事進員外郎忱有  
經世才浮沈郎署二十載人無知者獨夏原吉奇之宣德  
初有薦爲郡守者原吉曰此常調也安足盡周君帝以天  
下財賦多不理而蘇州一郡積逋至八百萬石思得才臣  
往釐之乃用大學士楊榮薦超遷忱工部右侍郎巡撫江  
南兼督稅糧初太祖平吳盡籍其功臣子弟莊田入官後



惡富民豪并坐罪沒入田產皆謂之官田按其家租籍征之故蘇賦比他府獨重官民田租共二百七十七萬石而官田之租乃至二百六十二萬石民不能堪時宣宗屢下詔減官田租忱乃與知府況鍾曲算累月減至七十二萬餘石他府以次減民始甦息終忱在任江南數大府小民不知凶荒兩稅未嘗逋負忱之力也九載秩滿進左侍郎六年命兼理湖州嘉興二府稅糧忱素樂易既久任江南與吏民相習若家人父子每行村落屏去騶從與農夫餉婦相對從容問所疾苦嘗詣松江相視水利見嘉定上海間沿江生茂草多淤流乃濬其上流使崑山顧浦諸所水迅流駛下流之壅遂盡滌暇時以匹馬往來江上見者不知其爲巡撫也再以九載滿進戶部尚書尋以江西人不

得官戶部乃改工部仍巡撫景泰中還朝旣而言官交章劾忱景帝素知忱賢但令致仕而已忱旣遭劾帝命李敏代之勅無輕易忱法然自是戶部括所積餘米爲公賦儲備蕭然其後吳大饑道饑相望課逋如故矣民益思忱不已即生祠處處祀之以景泰四年卒諡文襄

明史藁

薛方山曰文襄巡撫南都二十二年虛心訪問善采衆長謀畫深遠苟可利民利國破格爲之處事周而且敏大都以便宜從事一時理財無出其右者矣

彭璉字汝器以字行安福人永樂進士授翰林修撰時年二十餘學問文章已冠時輩駕幸北京與扈從之列歷官翰林學士卒年三十三所著有扈從五雲二藁

石溪集

按彭璉林志不詳今采周功叙所撰文集序改補



劉敬字子欽吉水人永樂癸未江西鄉試第一明年甲申會試第一時所取四百七十三人太宗拔二十八人為庶吉士敬在選中賜名俾入文淵閣讀中祕書仁宗嗣位命經術之士謫居戍伍者舉任教官時曾棨為翰林學士以敬應詔起為新淦縣學訓導生徒多所造就歲滿致仕歸卒年八十有八

分省人物考

按劉敬林志豫章書均不載今增入考登科錄曾棨榜進士有劉子欽吉水人又有劉子敬廬陵人而無劉敬人物考所云敬在庶吉士選中賜名云云者疑子欽初以字行而後賜名為敬也但郡縣志俱云子欽官主事與人物考又不合俟再攷

陳士啟名雷以字行泰和人永樂進士選庶吉士擢禮部郎

中尚書呂震擠尹昌隆至死屬吏皆憚之承奉唯謹士啟獨不少徇永樂十二年吏部言布按二司多缺官諸曹郎給事中出為監司者二十餘人士啟得山東右叅政盡心吏事不為察察名青州饑疏請賑之粟使至而飢民倍士啟復上疏先出粟予民謂使者曰有罪吾獨任廷議竟從之坐唐賽兒亂下獄數月釋還職高煦謀不軌士啟密聞于朝煦既執從薛祿張本錄餘黨撫安人民事竣命清理山東軍籍宣德六年卒于官

明史藁

按陳士啟事跡詳見曾松臞所撰行狀中獨不及密啟高煦不軌事今從史傳

楊相字之宜泰和人永樂甲申會元以庶吉士入讀中祕書天資闡爽文學疏通朋輩鮮與之匹任刑部主事卒

明一



周源吉水人永樂鄉舉知天台縣時鹽禁方嚴賦無所出民多流移源奏免其賦復業者四百餘戶陞常州知府比至縱囚出外舍約期聽理無一亡去者值歲大歉朝廷勅重臣賑濟源建白借運兌糧以濟之

人物志

按周源林志不載

蕭寬字雅容吉水人永樂進士選庶吉士與修永樂大典授兵部主事累官湖廣左布政使為人寬容端重未嘗見其有疾言遽色所至有聲

明一統志

余學夔字一夔泰和人永樂進士由翰林庶吉士官至侍講兩朝實錄成當遷上疏致政去所著有北軒集

豫章書

陳衡永樂進士授御史歷巡按廣東河南陝西風裁表著秩

滿自引去

人物志

按登科考陳衡永新人

李昌祺名禎以字行廬陵人永樂進士預修永樂大典僻書疑事人多就質擢禮部郎中遷廣西左布政使坐事謫役洪熙元年起故官涖河南繩豪猾去貪殘疏滯舉廢救災卹貧與右布政使蕭省身共為治政化大行憂歸宣宗已命侍郎魏源代時河南大旱廷臣復請起昌祺奪喪赴官撫恤甚至正統改元上書言三事皆報可致仕二十餘年屏跡不及公府故廬裁蔽風雨伏臘不充景泰中卒

明史

藁

按昌祺所著有容膝軒運甓漫藁

蕭省身泰和人與昌祺同舉永樂甲申進士洪熙元年布政



考滿當給誥命奏父年八十餘願以給父帝嘉而許之後  
遂爲例居河南十二年治行與昌祺等同上

按豫章書省身初由庶吉士改刑部主事進郎中超擢  
河南右藩卒時年甫五十君子惜之

劉叔恣廬陵人初爲沅陵知縣縣介谿洞困徭役者率竄山  
谷叔恣至計其丁貲而役之流亡復業有爭訟不治以法  
爲開諭再三心服而後遣之陞北京行部員外時新置行  
部兵飢之後庶務叢脞工曹尤甚叔恣以廉勤著尋陞辰  
州府同知及建北京宮殿率郡民就役卒于北京民之在  
役者歸時載其喪葬辰州分省人物考

羅汝敬名簡吉水人永樂進士選庶吉士就學文淵閣擢修  
撰滿九載進侍講仁宗時上言時政十五事忤旨下獄旣

與李時勉同改御史直聲震朝廷宣德初上書大學士楊  
士奇謂車駕幸天壽山躬謁二陵將以稱殷禮展孝思也  
旣而道路喧傳禮畢即較獵講武扈從惟也先土干與其  
徒數百人風馳電掣倏去忽來馳逐先後某聞此言心悸  
膽落夫以謁陵出而與降將較獵於山谷間垂堂之戒銜  
槩之虞不可不深慮也執事四朝舊臣二聖元輔於此不  
言則孰得而言之者惟特加采納以弘靖獻之思尋擢工  
部右侍郎往安南撫諭黎利復再往封陳暲還督兩浙漕  
運理陝西屯田多所建置西邊有警督餉遇敵紅子城中  
流矢墜馬得免以疾告歸卒明史藁

按林志汝敬名肅與史不同考登科錄永樂甲申進士  
有羅汝敬蓋以字行也所著有寅庵集



李時勉名懋以字行安福人永樂進士選庶吉士進學文淵閣與修太祖實錄授刑部主事復與重修實錄書成改翰林侍讀三殿災詔求直言條上時務十五事成祖決計都北京而時勉言北京營建之非疏入大拂帝意尋被讒下獄赦復職洪熙元年復上疏言事仁宗怒甚縛至便殿對不屈命武士撲以金瓜脇折者三曳出下錦衣獄時勉於錦衣千戶某有恩千戶適涖獄密召醫療以海外血竭得不死宣宗即位踰年復原官修成祖實錄成遷侍讀學士帝幸史館撒金錢賜諸學士皆俛取時勉獨正立帝乃出餘錢賜之正統三年進學士掌院事兼經筵官六年祭酒貝泰罷以時勉代之九年帝視學祭酒當進講時勉久病嗽及升堂色溫氣定講尚書辭旨清朗帝悅賜予有加連

疏乞致仕皆不允十二年乃得請命給驛卒年七十七謚文毅其孫顥請改謚更謚忠文贈禮部侍郎

同上

按時勉初入翰林與陳敬宗同官素忠徹嘗相之曰二君他日名位相埒後果各為南北祭酒終明之世稱賢祭酒者曰南陳北李云吉州人文紀略時勉名聰與史傳異所著有立廉集

王芳孫字瀘淵安福人官山東河南布政清慎自持璽書褒之子高亦以進士官至福建右布政使居官四十餘年清慎如其父人咸重之

林志

劉髦字孟恂永新人永樂戊子鄉薦下第歸道淮徐會洛水大至一女子浮槎出沒波濤間亟呼求救莫有應者髦厚犒長年往拯得不死詰其所自則富商女也憐其舉家漂



沒以女畜之載與俱歸將為擇配其妻再四勸之乃納為  
貳室生子定之寅之皆登進士髦所著有易傳撮要修身  
箴覆瓿集石潭存藁以定之貴贈司經局洗馬

豫章書

按人物志髦居石潭之上講學以為樂弟子甚眾稱石  
潭先生云

王直字行儉泰和人永樂進士改庶吉士授修撰歷事仁宗  
宣宗累遷少詹事兼侍讀學士正統初進禮部右侍郎久  
之出涖部事尚書胡濙悉以部政付直處之若素習者八  
年代郭璉為吏部尚書帝將親征也先直率廷臣力諫不  
從命直留守京師王師覆於土木率羣臣請太后立皇太  
子奉郕王攝國政已勸即真以安反側議上皆直為首而  
直自以不如于謙每事推下之加太子太保景泰元年進

少傅也先使使議和且請還上皇下禮部議未決直率羣  
臣上言宜從其請遣使往報因察其誠偽而撫納之乃遣  
李實羅綺往已而揚善竟奉上皇還帝欲易太子未發會  
思明土知府黃玠以為請帝喜下禮部議文武諸臣議者  
九十一人當署名直有難色陳循濡筆強之乃署竟易皇  
太子景帝疾亟直等請復立沂王為皇太子推大學士商  
輅草疏未上而石亨徐有貞等奪門迎上皇復位直遂乞  
休給驛歸家居六年卒年八十四贈太保謚文端子積仕  
翰林檢討亦以學行稱曾孫思自有傳

明史藁

鄭淡泉曰正統以降泰和為銓曹尚書秉正懸公官評  
清允以故朝多壽俊野無廢錮蔚蔚乎有豐芑棫樸之  
化焉按直為冢掌十六年休疏凡十三上始允所著抑



西漢志 卷七十七  
三  
庵詩文集各若干卷

朱與言字一諤萬安人永樂進士累官南京都察院右副都御史上疏論時弊極痛切上皆納之未幾乞休家居肅然如在官韓雍巡按江西尚嚴憚焉林志

張宗璉字重器吉水人永樂進士改庶吉士授刑部主事仁宗即位擢左中允會詔朝臣舉所知禮部郎中况鍾以宗璉名上擢南京大理丞宣德元年詔遣吏部侍郎黃宗載等十五人出釐各省軍籍宗璉往福建明年坐奏事忤旨謫常州同知朝遣御史李立理江南軍籍檄宗璉自隨立受黥軍詞多逮平民實伍宗璉數爭之立怒宗璉輒卧地乞杖曰請代百姓死未幾疽發背卒常州民白衣送喪者千餘人為建祠明史藁

蕭時中名可以字行廬陵人永樂辛卯進士第一授翰林修撰奉天殿災陳言八事極盡時弊善導婉諷上嘉納焉嘗預修四書五經性理大全諸書豫章書

按明一統志時中之兄不敏事母盡孝以詩經薦上春官會時中充考官避嫌不入歸而教授鄉里

劉咸字士皆泰和人永樂進士歷官河南按察副使改廣東時營繕北都被命董運木料卒于官文章政事俱有名于時著有河南咏古集虛庵集同上

劉麟應字顯人安福人父環紹興太守麟應蚤孤廢學隨族人商于廣解學士外貶道廣一見竒之勉令就學麟應感激勵志學以大成登永樂乙未進士由庶吉士授修撰以疾懇歸同上



錢習禮名幹以字行吉水人永樂進士選庶吉士習禮與練子寧姻戚既仕鄉人以奸黨持之恒惴惴楊榮乘間言於帝帝笑曰使子寧在朕猶當用之况習禮乎仁宗即位遷侍讀知制誥宣德中進侍讀學士英宗開經筵為講官擢學士掌院事七年以故鴻臚寺為翰林院落成諸殿大學士皆至習禮不設楊士奇溥坐曰此非三公府也其剛正有執類如此正統九年乞致仕不許禮部右侍郎缺廷議用苗衷特旨命習禮力辭不允王振用事達官多造其門習禮恥為屈復上章乞骸骨卒年八十有九諡文肅

明史

按習禮歷事四朝兩扈北巡三修實錄八典文衡當時大制作多出其手豫章書稱其歸熙老堂子孫侍教者

十五年所著有應制集詞垣續藁歸田藁

陳賞字公延泰和人繼先子永樂進士擢廣西僉事守官清苦卒無以為殮同官周之始得返喪

人物志

按陳賞所著名橋梓後集

陳正倫吉水人永樂進士為御史斥蠹摘奸務愜民心累遷陝西四川按察使政益嚴整姦貪猾巨不敢蹈故智以自逞楊文貞最重之稱為畏友

同上

歐陽和字允和泰和人永樂進士授監察御史居官寬厚坦亮太宗亟稱之曰歐陽御史真識大體者後陞雲南副使

卒

林志

羅通字學古吉水人永樂進士授御史巡按四川三殿災偕同官何忠等極陳時政闕失忤旨出為交趾清化知州宣



德元年黎利反賊方圍化通堅守乘間出破賊殺傷甚衆  
賊知城不可拔引去會朝議棄交趾通始率吏士歸改戶  
部員外郎出理宣府軍餉遷兵部郎中坐事下獄以于謙  
薦起兵部員外守居庸關也先破紫荆長驅犯京師別部  
攻居庸甚急天大寒通汲水灌城冰堅不得近七日遁走  
追擊破之景泰元年召入參贊京營軍務兼理院事給事  
中覃浩等言通本以知兵用不宜理院事乃解其兼職通  
本于謙所舉而每事抵牾人由是不直通天順三年致仕  
歸卒

明史藁

按羅通事林志不詳今采史傳存其槩豫章書云弘治  
十八年追錄己巳保障功勅建祠居庸關此段史失載  
彭勗字祖期永豐人永樂進士親老乞近地以養除南雄府

教授學舍後有祠數現光怪學官弟子率禱祀勗撤而焚  
之滿考補建寧教授朱子故宅有祠無祭勗為疏請蠲子  
孫徭勗尊賢堂祀胡安國蔡沈真德秀諸生翕然嚮學以  
楊士奇薦召拜御史初設提學官命督南畿學校詳立教  
條士風大振又請設南京諸衛武學所至葺治先賢墳祠  
母憂歸起復改吏部考功郎中土木之變數言兵事以直  
不容于時致仕歸

同上

李昉字宗昉吉水人由太學生除行在吏部主事宣德二年  
征交趾兵部尚書李慶贊軍務昉以文學參謀死國事

安志

陳循字德遵泰和人永樂乙未進士第一授翰林修撰宣德  
初與楊溥同受命直南宮日承顧問賜第玉河橋西正統



九年入文淵閣典機務初廷議時政三楊主之至是士奇榮已卒循及曹鼎馬愉皆得預議明年進戶部右侍郎兼學士土木之變人情洶洶循居中所言多采納進戶部尚書也先犯京師請勅各邊精騎入衛馳檄回番以疑敵帝皆從其計尋進少保兼文淵閣大學士嘗集古帝王行事名勤政要典上之英宗復位于謙王文死杖循百戍鐵嶺衛石亨等敗詔釋為民一年卒成化中于謙事雪循子引例請卹乃復官賜祭 明史藁

按陳循所著有芳洲集林志載其末路事頗失實今依史傳

胡種吉水人永樂間以廕補翰林檢討進侍講正統間忤中貴王振謫戍於邊天順改元上察其忠鯁召還復官 林志

楊黼吉水人永樂進士授御史仁宗即位上疏言十事擢衛

王府右長史盡心獻替未嘗苟取一錢宣德初卒 明史藁

按黼林志人物志皆作黻考登科錄永樂乙未進士有楊黻無楊黼應改正攷志黻字民服史傳亦失載

廖謨字文績泰和人永樂進士官河間知府多惠政有古循良風嘗任刑部主事福建僉事以明刑著稱 明一統志

周勉字功懋號雪坡吉水人學士叙之兄少與叙同學銳然有用世志以父命總理家事四十年食口以指計之積至千二百餘公私出入皆所經畫孝友本諸天性其死也學士為志墓所著有雪坡詩集 石溪集

周叙字功叙吉水人永樂進士選庶吉士作黃鸚鵡賦稱旨授編修歷侍讀直經筵正統八年夏上言比天旱陛下責



躬虔禱而臣下不聞效忠補過之言掌銓選者罔論賢否  
第循資格司國計者不問耕桑惟勤賦斂軍士困役作刑  
罰失重輕風憲無激揚言官惟緘默僧道數萬日耗戶口  
流民衆多莫為矜恤帝以章示諸大臣王直等皆引罪求  
罷久之擢南京翰林侍講學士叙以宋遼金三史體例多  
未當疏請重修詔許自撰力疾詮次不克就而卒

明史藁

按豫章書稱周學士居禁近三十餘年雖以文字為職  
業尤注意于國事前後章疏皆切時政所著有詩學梯  
航唐詩類編今不傳傳者名石溪集

彭琉字毓敬安福人永樂進士時營建北京委琉督軍夫于  
畿內督運木于山東皆如期而集大學士楊士奇薦之授  
翰林編修預纂宣德實錄出為廣東山西督學改副使參

贊廣西軍務引疾歸自少至老讀書不倦所著有息菴集

慎庵集備忘錄 豫章書

尹鳳岐字邦祥吉水人永樂進士由庶吉士官至侍讀為文

章有法度根理據義磊落奇偉 明一統志

曾泉字本清泰和人永樂進士選庶吉士改御史宣德初謫  
汜水典史卒正統四年河南叅政孫原貞上言泉操行廉  
潔服官勤敏不以降黜故有偷惰心躬督民闢荒土收穀  
麥伐林木備營繕通商賈完逋責官有儲積民無科擾有  
羨餘矣然後造舟楫置棺槨贍民器用百姓婚喪不給者  
咸資於泉卒之日老幼巷哭臣行部汜水泉歿已三年民  
懷其惠言輒流涕雖古循吏何以加宜下詔褒美追復泉  
爵褒既往以風方來帝從之 明史藁



郭循廬陵人永樂進士擢刑部主事錄囚南京于枉抑多所  
伸雪嘗論列營繕之事因改工部官至廣東參政温厚詳  
明表裏洞徹見苛刻者每曰此輩自絕生理得以是微名  
干祿初不知名天之謹也 林志

曾鶴齡字延年永樂辛丑及第第一人授修撰歷升侍講學  
士子蒙啟蒙簡皆舉進士蒙簡擢御史卓有風裁其子追  
進士及第官編修鶴齡所著有松坡集臞叟集 豫章書

按曾鶴齡事詳見王文端所撰墓志中

劉子輔廬陵人永樂間歷官廣東副使左遷交趾諒江知府  
值黎利來寇諸縣多陷子輔以義激守將及兵民死守數  
月寇來益衆攻益急城破兵民俱死戰無一人降者子輔  
曰吾奉命守郡郡亡義不可汙賊手遂自死一子一妾亦

死之事聞贈布政司叅政遣官賜祭復其家 人物志

艾鳳翔吉水人永樂進士任工部主事上章乞歸養親遂奉  
以終身日肆力于學四方從游者甚衆 林志

歐陽哲字廣哲泰和人永樂進士官浙江僉事轉河南副使  
上疏言漕河利害上嘉納之賜以文綺歷官四十年以清  
介著所著有雪坡集 人物志

萬節字資中安福人永樂進士官至廣西按察副使操執不  
苟泣事詳審非人所易及 明一統志

劉球字求樂安福人永樂進士授禮部主事胡濙薦侍經筵  
與修宣宗實錄改翰林侍講正統六年王振欲立威邊陲  
用王驥征麓川球抗疏力諫章下兵部謂已有成命不用  
球言八年四月雷震奉天殿球應詔上言所宜先者十事



初球言麓川事振固已銜之欽天監正彭德清者球鄉人也素爲振腹心倚勢爲姦公卿多趨謁球絕不與通德清恨之遂摘疏中攬權語謂振曰此指公耳振益怒逮下詔獄屬指揮馬順殺球深夜順攜一小校持刀至球所球方卧起立大呼太祖太宗頸斷體猶植遂支解瘞之獄戶下後其子鉞求得一臂裹裙以殮球死數年土木之難作振被殺朝士立擊順斃之德清自土木遁還下獄論斬景帝憐球忠贈翰林學士諡忠愍球二子長鉞次鈺皆篤學痛父冤遂絕意仕進躬耕養母球既得卹兄弟乃出應舉先後成進士鉞廣東叅政鈺雲南按察使

明史藁

按忠愍所著有兩溪集忠愍死事狀詳見羅念庵集中劉廣衡字克平萬安人永樂末進士正統間以刑部郎中出

修浙江荒政積粟數百萬督治陂塘爲旱澇備景泰初歷左副都御史鎮守陝西請遇災傷毋俟勘報即除其賦庶有司不得借覆核陰行科率從之已兼撫福建浙江議創壽寧縣於官臺山以清盜窟討平處州賊居官以廉節稱終刑部尚書

同上

李信圭字君信泰和人洪熙時舉賢良授清河知縣縣瘠而衝官艘日相銜役夫動以千計前令請得沐陽五百人爲助然去家遠艱於衣食信圭請免其助役代輸清河浮征三之二兩邑便之俗好發冢縱火信圭設教戒十三條令里民書於牌月朔望儆戒之且令書其民勤惰善惡以聞俗爲之變宣德八年上言自江淮達京師沿河郡縣悉令軍民挽舟若無衛軍則民夫盡出有司歲發二三千人晝



夜以俟致土田荒蕪請自儀真抵通州盡免其雜徭俾得盡力農田兼供夫役從之自是他郡亦蒙其澤正統元年擢知蘄州清河民詣闕乞留命知州理縣事十一年冬以尚書金濂薦擢處州知府其在清河已二十二年矣處州方苦旱信圭至輒雨未幾卒於官清河民立祠祀之同上

西江志卷第七十七

西江志卷第七十八

人物 十三

吉安府 四

明

蕭鎡字孟勤泰和人宣德進士需次於家八年帝命楊溥合選三科士拔二十八人爲庶吉士鎡爲首授編修正統三年進侍讀久之代李時勉爲國子監祭酒景泰初以老疾辭監丞鮑相率監生三千人叩闕請留明年以本官兼翰林學士入直文淵閣進戶部右侍郎易儲議起鎡曰無易樹子霸者所禁矧天朝乎不聽加太子少師寰宇通志成進戶部尚書帝不豫諸臣議復憲宗東宮李賢私問鎡鎡曰旣退不可再也英宗復位遂削籍天順八年卒成化中



復官賜祭

明史藁

按蕭鎡鵬舉子明史無專傳附見陳循傳後學問該博文章爾雅豫章書載其所著有成均詞垣尚約三集

蕭啓字斯暘龍泉人宣德進士累官僉都御史巡撫山西減冗軍以甦民困募富民以實邊儲凡政有利不利者罷行惟宜

人物志

劉儁永新人宣德進士授御史陞按察僉事所至風采凜然嘗稱學莫先於義利之辨著有木菴集行世

同上

吳節字與儉安福人宣德進士由庶吉士官至侍讀學士已巳之變條陳十餘事皆國家大政多見采納為南祭酒督修國學廟解成降詔褒之歷任太常卿致仕年八十五卒

同上

劉實字嘉秀安福人嗜古博學宣德進士選庶吉士正統初授金華府通判仍歲荒旱請蠲租且贖還飢民子女義門鄭氏族大不能自給又買馬出丁供山西郵傳困甚亦以實言獲免母喪歸廬墓三載起順天府治中景泰時召修宋元通鑑綱目天順四年出知南雄府中官至南雄入譖言誣奏實毀敕大不敬逮下詔獄實從獄中上書言臣官三十年未嘗以妻子自隨食粗衣敝為國家愛養小民不忍困之以是忤朝使帝覽書意稍解且釋之而實竟庾死南雄人哀而祠之

明史藁

廖莊字安止吉水人宣德進士授庶吉士改刑科給事中有敢言聲久之遷南京大理左少卿景泰五年七月上疏曰臣曩在朝睹上皇遣使冊封陛下每遇慶節必令羣臣朝



謁東廡恩禮隆洽羣臣皆感歎謂上皇兄弟友愛如此今  
陛下奉事上皇願時時朝見或講明家法或商略治道歲  
時令節俾羣臣朝見以慰上皇之心如此則孝弟刑于國  
家恩義通於神明矣又太子者天下之本上皇之子陛下  
之猶子也宜令親儒臣習書策以待皇嗣之生使天下臣  
民曉然知陛下有公天下之心豈不美與疏入不報廷杖  
八十謫定羌驛丞天順初召還擢禮部右侍郎尋調刑部  
成化初爲刑部左侍郎逾年卒贈尚書諡恭敏

同上

萬齊安福人宣德進士授陽朔知縣至則令民墾土田春耕  
時具酒脯躬自勸勞建新學選秀民親加訓誨嫁娶葬祭  
教之皆有品節民俗爲之一變

人物志

蕭維禎廬陵人宣德進士累官刑部尚書性瓌偉而才充敏

爲法官數十年練達事體老於斷案諸法吏皆屈服之

林

尹昌字輯禎吉水人宣德進士官行人已巳之變扈駕北征

知勢不可爲自刎死

同上

李紹字先述安福人宣德進士入翰林爲庶吉士賜詩勉勵  
累官學士擢禮部右侍郎纂修大制作多出其手致政家  
居廷議起爲祭酒未赴而卒初英廟復辟有邀迎駕功者  
強與俱紹辭曰諸公自足辦之何有於紹及拜侍郎冢宰  
翱舉酒酬曰李公天選侍郎也蓋譏一時附勢倖進者

上

曾翬字時升泰和人宣德進士授刑部主事進員外郎中擢  
廣西右叅政尋以憂去服闋起官河南御史清軍者利得



軍多枉及民輩辨釋甚衆南陽諸府多流戶衆議驅逐人情惶急輩撫安之遷山東右布政使民墾田無賦者奸民指爲閒田獻諸戚畹部使者來勘輩曰祖制民墾荒田永不科稅奈何奪之使者奏如言乃免召拜刑部左侍郎尋巡撫浙江考察官吏奏罷不職者百餘人他弊政多所釐革還朝久之謝病去

明史藁

按林志所載曾輩宦蹟與史全不同今從史吉州人文紀略稱其致仕二十餘年清風雅操足繼楊文貞而優游林泉則兼文貞所無之樂晚年自號龍坡居士所著有龍坡集今不傳

蕭聰字孟奎泰和人宣德進士初爲刑部郎中受命總督修城調度經畫有方歷官禮部侍郎改南吏部左遷湖廣布

政司叅議

林志

劉益吉水人宣德進士授兵科給事中封駁彈劾務存大體已巳之變上命往山東招募民兵以備邊防官至祭酒卒

人物志

鍾同字世京永豐人父復宣德進士歷翰林院修撰與劉球善球上封事復預其謀妻勸止球詣復邸邀偕行復已他往妻從屏間詈曰汝自上疏何累他人爲球出歎曰彼乃謀及婦人遂獨上奏竟死居無何復亦病卒妻深悔之每號輒曰早知爾曷若與劉公偕死同幼聞母言即感奮思成父志嘗入吉安忠節祠見所祀歐陽修楊邦乂諸人歎曰死不入此非夫也景泰二年舉進士明年授御史遇事敢言懷獻太子旣卒與郎中章綸早朝語及沂王皆泣下



因與約疏請復儲大略謂太子薨逝足知天命有在今皇儲未建國本猶虛上皇之子即陛下之子沂王天資厚重足令宗社有託伏望擴天地之量敦友于之仁蠲吉具儀建復儲位疏入帝不懌後數日章綸復儲疏繼上下詔獄考訊遂并繫治同封巨梃就獄中杖之同竟死時年三十二同之上疏也策馬出馬伏地不肯起同叱曰吾不畏死爾奚爲者馬猶盤辟再四乃行同死馬長號數聲亦死英宗復位贈大理左寺丞謚恭愍從祀忠節祠與球聯位竟如同初志

明史藁

陳文字安簡廬陵人鄉試第一正統元年進士及第授編修尋命進學東閣秩滿遷侍講景泰二年閣臣高穀薦文才遂擢雲南右布政使雲南產銀民間用銀貿易視內地三

倍隸在官者免役納銀亦三之文曰雖如是得無傷廉乎損之復令減隸額視舊三之一遷廣東左布政使英宗復位召爲詹事入侍東宮講讀進禮部右侍郎兼學士入內閣憲宗即位進禮部尚書羅倫論李賢奪情文陰助賢逐倫英宗實錄成加太子少保兼文淵閣大學士成化四年卒贈少傅謚莊靖文素以才自許在外頗著績効士大夫多冀其進用旣叅大政無所建明性卞急遇睚眦怨必報歿後禮部主事陸淵之疏請更予惡謚帝以事已施行不許

同上

按人物志文所著有聚齋需軒二藁藏於家

劉定之字主靜永新人幼有異稟父髦日授定之書數千言舉正統元年會試第一殿試及第授編修京城大水應詔



陳十事弟寅之與鄉人相訐辭連定之下獄得白秩滿進侍講景帝即位復上言十事書奏帝優詔答之三年遷洗馬天順改元調通政司左叅議仍兼侍講尋進學士成化二年以本官入直文淵閣進工部右侍郎五年卒官贈禮部尚書謚文安定之謙恭質直以文學名一時嘗有中旨命製元宵詩內使却立以俟據案伸紙立成七言絕句百首又嘗一日草九制筆不停書人服其敏博

同上

按劉定之所著名呆齋集

梁黎字叔車泰和人正統進士累官浙江布政使入覲恩賚甚隆清操粹行爲時稱最滿九載卒於官

林志

按梁黎所著有松軒集

蕭翼字體全永新人正統進士知潛山教民種芋民因謂之

蕭公芋改知長垣黃河漂民舍十常八九翼浚河築堤身先衆役發粟賑貸踰二稔而水定任滿特恩褒嘉陞順德

知府

同上

陳宜字公宜泰和人正統進士任工科給事嘗建言省迎春冗費以千計遂著爲令累官副都御史巡撫貴州轉兵部左侍郎卒爲人謹厚有德望而經術尤正

林志

劉錯字用甫泰和人正統進士任刑部主事條陳十四事皆見采納歷陝西山東僉事調雲南旣歸清約如貧士

明一

統志

周鐸字秉訓萬安人正統進士累官廣東布政使以清慎勤著聲所至有遺愛焉

同上

左鼎字周器永新人正統進士授御史巡按山西乘輿北狩



悉心畫戰守時兵荒洊臻請蠲太原諸府稅糧停大同轉  
餉夫以蘇其困也先請和抗言不可引宋景德靖康事為  
鑒尋以山東河南饑遣鼎巡視民賴以安景泰四年以災  
異偕同官陳救弊恤民七事未言大臣不乏奸回宜黜罷  
其尤用清政本帝善其言下詔甄別吏部尚書何文淵通  
政使李錫竟由是去鼎居官清勤卓有聲譽御史練綱以  
敢言名而鼎猶善為章奏京師語曰左鼎手練綱口英宗  
復位為左僉都御史踰年卒

明史藁

按左鼎所著有立齋集

羅如壙字本崇廬陵人正統進士授行人已巳與司正尹昌  
扈駕北征及土木敗績遂死之景泰間詔旌其忠錄一子  
入太學

人物志

劉觀字崇觀吉水人正統進士年方少忽引疾告歸尋丁內  
艱服除終不出杜門讀書求聖賢之學四方來問道坐席  
嘗不給縣令劉成為築書院於虎丘山名曰養中四壁皆  
書先儒語錄又大書誠明敬義四箴以示學者每日端坐  
一室無懈容或勸之仕不應又作勤儉恭恕四箴以教其  
家取呂氏鄉約表著之以教其鄉族有孤嫠不能自存者  
周之使全其節歿於所居之臥廬學者稱臥廬先生或請  
著述曰朱子及吳文正公之言尊信之足矣復何言吳與  
弼其鄰郡人也極推重之觀之前有孫鼎廬陵人永樂中  
為松江府教授以孝弟立教後督學南畿人稱為貞孝先  
生又有李中吉水人官至副都御史號谷平先生在觀後  
是為吉中三先生中自有傳

明史藁



劉玘字求素安福人忠愍球之弟從忠愍受春秋登正統己未進士第授莆田令在邑九載績滿當去民詣三司乞留者以萬計不果入為刑部主事陞員外有胡指揮者因妻姦謀殺人玘論其罪死其人素附貴幸改讞於錦衣衛坐玘以故入罪謫戍遼陽在遼五年日以文章自抒寫題其集曰養晦卒於戍所

彭文思公集

按劉玘事林志不載詳見彭時所撰劉雙峰傳中

張洪安福人正統進士以御史扈從土木死詔追卹之

人物志

志

曾蒙簡名廉鶴齡子正統進士歷官浙江按察使剖決如流政聲大著所著有介菴集

林志

王槩字同節廬陵人正統進士授刑部主事歷郎中出為湖

廣叅政調河南所至郡縣無留牘獄無冤詞遷按察使天順初被誣繫獄襄憲王入朝言其冤上立命法司雪槩還任尋陞右副都御史巡撫陝西改大理卿出入七年凡兩法司及畿藩讞奏叅錯情法多所平反成化八年遷刑部尚書卒官諡恭毅子臣成化進士翰林侍講

吉州人文紀畧

劉孜字顯孜萬安人正統進士授御史出按遼東景帝即位有建南遷議者孜馳奏乞斬言者以定人心期滿當代朝議邊務方殷孜能懾服將吏復留一歲再按畿輔時方築滄州城以孜言罷擢山東按察使俄遷左布政使明年春以右副都御史巡撫江南十府蘇松財賦自周忱立法後代者多紛更孜首訪忱遺規斟酌行之民稱便拜南京刑



部尚書致仕道卒

明史藁

楊渙字德濟泰和人正統進士知四會縣有惠政猺峒率聽約束地產斷腸草頑民逞忿者取食之以死誣人渙下令訟者入其草連根者若干乃與理久之其種遂絕後卒於

廣東僉事

林志

彭時字純道安福人正統十三年進士第一授修撰明年郕王監國令同商輅入閣預機務時聞繼母憂力辭不允乃拜命釋褐踰年即秉政前此未有也尋進侍讀擢左春坊大學士天順元年仍命入閣兼翰林院學士閣臣自三楊後進退禮甚輕為帝所親擢者唯時與岳正二人而帝方嚮用李賢數召賢獨對然賢雅重時退必咨之時引義爭可否或至失色賢初小忤久之心折曰彭公真君子也憲

宗即位議上兩宮尊號欲獨尊所生母周貴妃中官傳旨曰子為皇帝母當為太后豈有無子而稱太后者宣德間有故事時曰今日事與宣德間不同胡后表讓位退居別宮故正統初不加尊今名分固在安得為比中官厲聲怵以危語時拱手向天曰太祖太宗神靈在上孰敢有二心錢皇后無子何所規利而為之爭不忍默者欲全主上聖德耳若推大孝之心則兩宮並尊為宜賢亦極言之議定及將上寶冊時云兩宮同稱則無別錢太后宜加兩字中官曰既並尊何復別為時曰加之以便稱謂非有低昂也乃尊皇后謂慈懿皇太后貴妃謂皇太后數日中官覃包至閣曰上意固如是但迫於太后不敢自主非二公力爭幾悞大事禮成進吏部右侍郎兼學士成化改元進兵部



尚書英宗實錄成加太子少保兼文淵閣大學士四年慈  
懿太后崩詔議山陵時及商輅劉定之言太后作配梓宮  
當合葬裕陵主當祔廟此不易之禮無可議者帝復猶豫  
時偕朝臣伏文華門泣請帝與太后皆感動始從時議改  
吏部尚書五年以後凡七在告十一年以言不見用力懇  
放還不許進少保踰月卒年六十贈太師謚文憲明史藁  
鄭淡泉曰成化間文憲公時文毅公輅事關綱常叩閤  
力諫時值佞幸請劔行誅皆能賁飾絲綸興制禮樂豈  
非牖巷之遇賢於夢卜都俞之風幾於獻替乎

羅俊字承彥泰和人正統進士任御史歷官潯州知府蠻獠  
向化郡大稱治改南雄公廉寬厚有古循吏風明一統志  
劉昇永新人領正統鄉薦寧藩器之請為已用遣官諭意昇

不可明年中進士授翰林院編修居翰苑年餘剛果無附  
刻意問學年三十而卒人咸惜之人物志

劉敷字叔榮永新人景泰進士授御史巡江時同差錦衣官  
虐民敷奏革之出為湖廣僉事歷布政使陞巡撫討平苗  
寇召還為都御史同上

按明史敷致仕家居後因李孜省薦復起與尹直李裕  
謝一夔等並用林志人物志俱諱其晚節不復詳及云  
劉儼字宣化正統七年進士第一授修撰歷右春坊進太常  
少卿兼侍讀主順天鄉試黜閣臣陳循王文子幾得危禍  
天順初改掌翰林院事卒官贈禮部左侍郎謚文介儼立  
朝正直居鄉亦有惠澤云明史藁

按劉儼史無專傳附見周敘傳後在翰林時奉旨修五



倫書歷代君鑑宋元通鑑綱目其自著別有文介公集  
 張達字時達泰和人正統進士授工部主事諫興佛塔出視  
 漕運適歲饑發粟以賑活民數千進光祿卿陞工部侍郎  
 卒於官羅整菴為作神道碑 安志

阮玘字廷用天順進士授行人所至不辱君命拜監察御史  
 貪暴不敢肆侵漁董築堤運河決堤令有司與民為期約  
 民悅事集尋以巡視鹽場冒暑得疾至京卒殮殯不能自  
 舉鄉舊共賻僅得歸櫬玘平生篤行動以古人自期孝友  
 尤為人所重云 明一統志

羅璟字明仲泰和人天順甲申進士及第授翰林編修充經  
 筵講官命纂續通鑑綱目成進司經局洗馬時李孜省惡  
 不附已陰中傷之調南京部屬轉福建提學副使冢宰王

恕薦為南京國子祭酒後以疾乞歸著有冰玉集 人物志

蕭禎字彥祥泰和人天順進士累官副都御史巡撫陝西陞

南京工部侍郎轉刑工二部尚書以疾致仕操持廉潔尤

精吏事故所至赫赫有聲 林志

彭教字敷五吉水人天順甲申進士第一授翰林修撰預修

英廟實錄書成進侍講拜白金文綺之賜主試南宮時稱

得人侍講經筵銳意輔導其文章秀發多奇氣而典則森

嚴所著有瀧江集 吉州人文紀畧

張敷華字公實安福人父洪御史死土木難敷華少負氣節

景泰初錄死事後入國學舉天順進士選庶吉士成化初

館試授職與劉大夏願就部曹乃除兵部主事歷郎中遷

浙江叅議歷右叅政右布政使弘治初遷湖廣歲饑令府



縣大修學宮以傭直資餓者擢右副都御史巡撫山西改撫陝西定婚娶喪葬之式納民於禮妖僧據終南山廷議用兵尚書馬文升曰張都御史能辦此敷華果以計縛僧改右都御史總督漕運兼巡撫淮揚諸府高郵湖堤圯浚深溝以殺水勢又築寶應堤民利賴焉改掌南京都察院與吏部尚書林瀚僉都御史林俊祭酒章懋稱南都四君子就遷刑部尚書召為左都御史其冬大臣與言官請去劉瑾等內閣力主之帝猶豫敷華乃上言陛下宴樂逸遊日狎儉壬政令與詔旨相背行事與成憲交乖致天變上千人心下拂國家大事百人爭之不足數人壞之有餘願陛下審察疏入不報既而宦官勢益張除夕朝罷忽傳旨與楊守隨俱致仕敷華即日就道劉瑾恨未已坐敷華與

守隨等五十二人為奸黨榜之廟堂家居一年卒瑾誅贈

太子少保謚簡肅孫鼇山官御史

明史藁

蕭昺由進士官湖廣左布政使天順四年舉治行卓異召拜禮部尚書初兩京尚書缺多用布政使為之自昺後遂無拜尚書者昺重厚廉靜有方面聲及居禮部疏於政體又不善奏對帝不懌調南京

同上

按蕭昺字仰善泰和人明史無專傳附見桂彥良傳後林志人物志皆以為官終布政使蓋失考也

伍希淵字孟賢安福人天順進士仕刑部員外郎錄南直浙江繫囚多所平反出為廣州同知承檄勦後山劇寇有功勾稽軍籍陳便宜二十事御史為下列郡行之子符由進士歷官直隸巡撫會武宗南巡鉅細畢辦上深嘉之武臣



劉暉宦官張忠並以寵倖前驅竊弄威福符正色與抗左  
右共嫉之駕旋僅拜銀牌之賜

人物志

彭華字彥實安福人景泰甲戌會試第一歷官禮部侍郎兼  
學士入內閣叅機務由吏部尚書加宮保致仕時道流方  
進用李孜省尤得幸或云華與萬安劉吉皆因以致大位  
云卒贈太子少傅諡文思有集

人物志

張業安福人景泰進士由庶吉士授檢討預修英廟實錄一  
統志歲早奉命祀中嶽海瀆應期雨降陞司業凡八年坐  
註誤落職士論惜之

林志

按業所著有書經節傳禮記節疏

王臣字克賓吉水人景泰鄉舉南京監察御史奉命巡解池  
鹽屏奸盜時出納近池地侵於土人者悉清理還之官周

池築垣塹一百二十里塹外為堰堰下置邏卒舖二十四  
所曲盡良法奸盜無所逞商賈便焉國課日充事聞壘書  
褒嘉未幾卒於官人

物志

按解州有忠愛祠正德間為王臣賜額

劉哲字公望安福人滁州學正嘗奏請專敕憲臣以提督學  
政從之陞鄭府長史王欲廢嫡立庶哲極諫王始迫以刑  
中誘以利終怵以亡身破家之禍哲曰身可殞家可破此  
倫不可紊密疏以聞遣官勘如奏遂冊立其嫡長之賢者  
改哲遼府長史

林志

劉宣字紹和安福人父戍盧龍蚤世宣代往因為衛學生在  
行伍中不廢學舉景泰庚午鄉試第一明年成進士選庶  
吉士授編修為經筵講官英廟實錄成陞右庶子進南太



常少卿掌國子監祭酒由吏部侍郎陟南工部尚書歲餘以疾卒性耿介疾惡不少徇多知國家典故為文以理勝不喜新奇所著名冲澹集

豫章書

按羅整菴集劉文懿公享堂鐘銘云正德十三年賜謚文懿豫章書人物志皆失載

尹直字正言泰和人景泰進士改庶吉士授編修成化初充經筵講官與修英宗實錄總裁既成進侍講擢侍講學士十一年遷禮部右侍郎丁父憂服除起南京吏部右侍郎改禮部左侍郎久之召佐兵部未幾改戶部兼翰林學士入內閣踰月進兵部尚書後在南部八年鬱鬱不得志屬其黨萬安彭華謀內召孝宗立御史湯鼐姜洪繆樗庶吉士鄒智等連章劾直給事中宋琮及御史許斌言直自初

為侍郎以至入閣夤緣攀附皆取中旨帝於是薄其為人令致仕直明敏博學練習朝章以躁於進取公論不與正德中卒謚文和

明史藁

按尹直末路附李孜省以進公論難掩史傳昭然林志人物志乃謂直曾疏劾孜省是非之公安在哉特采史傳以証其繆再攷直所著有宋名臣言行錄瑣綴錄澄江集續集別集等書

劉珂字本佩安福人景泰進士歷官廣東布政初宰麻城嘗因五蛇入庭而伸五人橫死之冤在山西發倉賑饑活人無數

林志

伍驥字德良安福人景泰進士授御史天順七年巡按福建先是上杭賊起都指揮僉事丁泉善捍禦賊屢攻城皆為



所却已而賊轉熾驥入境聞之立馳入汀州單騎詣賊壘  
從容立馬諭以禍福賊見其至誠感悟泣下歸附者千七  
百餘戶給以牛種俾復故業惟賊首李宗政負固不服遂  
與泉深入破之泉力戰為賊所害驥弔死恤傷激以忠義  
復與賊戰連破十八砦俘斬八百餘人冒瘴癘成疾班師  
至上杭卒軍民哀之為立祠成化中以知縣蕭宏請詔與  
泉並祀賜祠名褒忠子希閔成化進士歷官福建僉事再  
平上杭巨寇民德之並祠焉

明史藁

按明一統志驥姪希淵天順進士官至廣西布政希齊  
弘治進士終黃州推官一門俱有治績

傅韶字德音永豐人景泰進士歷刑部郎中剛明有執時太  
廟被盜竊金盆西臺繫至數百人韶承命往勘廉得真盜

誣逮者悉免知黃州益勵清操力折豪強庶務為之修舉  
人物志

王用泰和人景泰進士官至河南布政嘗巡按蘇松斷決如  
流獄無阻滯貪墨望風知懼

明一統志

康驥字德良泰和人景泰進士監察御史天順初闈宦竊弄  
威福驥抗章論其奸狀羣小泣訴於上乃下驥獄拷掠備  
至而詞氣侃侃不撓後復巡按山東北直隸所至風紀肅  
然吏民畏懾

林志

楊琚字朝用泰和人景泰進士兵部主事轉郎中紀功陝西  
奏改延綏城堡悉陳軍民利病多見采納尋陞叅議奉命  
撫治荆襄築老龍堤疏竹筒河開勅鄖陽厥功尤多

同上

羅倫字彝正吉安永豐人成化二年廷試答策萬餘言直斥



時弊擢進士第一授翰林修撰踰二月大學士李賢奔喪畢奉詔還朝倫詣賢沮之不聽復上疏劾奏謫福建市舶司副提舉亡何賢卒以學士商輅言召復原職改南京居二年引疾歸遂不復出以金牛山人跡不至築室著書其中四方從學者甚衆卒年四十八嘉靖初從御史唐龍請追贈左春坊諭德謚文毅學者稱一峰先生

明史藁

按陳白沙所撰羅彝正傳與史略同所著有一峰集

龍文字彥祥泰和人歷官文選司郎中以清慎著天順初陞南京工部侍郎卒

明一統志

劉遜安福人成化進士爲御史首劾巨璫蔣琮不法十事下詔獄謫外任復以裁抑岷府祿米被誣逮繫謫四川斷事歷陞湖廣副使逆瑾索賂不得又以他事逮獄奪職瑾誅

名還遜三繫獄而直節始終不回天下想望風采焉

人物志

李貢字惟正吉水人成化進士歷官都御史會流賊猖獗出入畿甸貢嚴甲令謹斥堠有王指揮者內結錢寧外與賊通貢廉得其狀召至詰責使擒賊以自效賊平乃寘之法擢兵部右侍郎以忤權貴意累疏乞歸卒

人物志

劉喬字述憲廣衡子成化進士擢監察御史按畿內八郡獨持風裁歷湖廣右布政廉明益著因奉命祀南嶽卒

林志

按劉喬訛作僑今據登科錄改正即端毅公玉之父也周淵字本深廬陵人成化進士授鄭州知州率民墾荒地數百頃導河流漑之授以手激法民利頓興巡撫李琰以暴刻陵長吏淵獨不爲屈所著有一溪集

人物志



周孟中字時可廬陵人成化進士歷官副都御史性剛毅重名節嘗講學白鹿洞來學之士每至數十人聽受問難媿媿不窮所著有畏齋集 同上

劉震字道亨安福人成化壬辰進士及第歷官南京祭酒性剛毅恥於詭隨爲文敏贍雄健所著有雙溪集 林志

王禎字維禎吉水人祖省死靖難兵成化初禎由國子生授夔州通判荆襄石和尚流劫至巫山督盜同知王某者怯不救禎即代勒所部民兵晝夜行至則城已陷賊方聚山中禎擊殺其魁餘盡遁乃行縣撫傷殘招潰散久乃得還甫三日賊復劫大昌指揮曹能柴成激禎曰公爲國出力肯復行乎禎即請往兩人僞賀許相左右禎上馬挾兩人與俱夾水陣旣渡兩人見賊即走禎被圍誤入淖中賊執

欲降之大罵賊怒斷其喉及右臂而死從行者奉節典史及部卒六百餘人皆死自死所至府三百餘里所乘馬奔歸血淋漓毛盡赤衆始知禎敗往覓屍面如生子廣鬻馬爲歸貲王同知得馬不償直櫬旣行馬夜半哀鳴王起視之馬驟前齧項擣其胸翼日嘔血死人稱爲義馬事聞贈禎僉事錄一子 明史彙

按人物志云禎成化中鄉舉林志云禎歿贈夔州同知與史傳各異

馬鉉字孔任永新人成化進士授工部主事遷員外改儀制司郎中上章糾內臣權傾中外天下喪氣異流左道欺罔聖德虧損蓋指斥汪直李孜省之輩疏入上震怒逮獄大學士劉珝申救還職未幾擢南太僕寺少卿調廣西叅議



適古田賊勢告急鉉矢志勤亂不避險阻初與賊遇斬獲過半窮追遇伏死之提學副使周孟中親為求屍七日乃得身無完膚事聞敕賜祭葬錄一子入國學特詔桂林府建忠臣廟歲時致祭焉

吉州人文紀畧

張黻字兼素吉水人成化進士歷後軍都督府經歷時刑曹林俊以忠諫下錦衣獄黻獨上章救之亦下獄尚書王恕上疏力救各杖謫黻降石州知州

人物志

鍾鯨廬陵人成化鄉舉知新興縣故事縣官率詣大府歲倍馬夫直以進鯨曰剥下以奉上吾不為也卒以正額上之守怒誣下獄當道廉得其實欲更其縣鯨曰以為有罪誠願斥罷若無罪何必更竟卒於官

同上

彭禮字彥恭安福人內閣文思弟也成化進士授兵部主事

歷官太僕少卿上言自古牧馬多在監苑未聞寄養民間今寄馬駒歲課無窮而民間戶丁生長有限以有限之丁責無窮之駒困何由蘇請定種馬之額為十萬歲取駒二萬五千高壯者備歲用不堪者變價貯太僕寺如有倒斃即令買補可為久遠之計兵部奏行之於是兩京種馬始有定額弘治五年陞太僕卿擢工部侍郎以副都御史總撫蘇松應天等處致仕卒

分省人物考

劉戩字景元安福人成化進士授編修進侍講孝宗朝使交趾餽遺一無所受交人為建卻金亭於思明道中後以春坊右諭德終所著有晉軒集

林志

曾彥字士美泰和人成化戊戌進士第一時年幾六十祭酒丘濬書歸第綵旗對云江右賢科十回虎榜魁天下西昌



文運三應龍洲過縣前都人榮之官至南京翰林學士預  
修憲廟實錄其為文不事刻削而思致綿邈自不可及  
明一統志

劉彬字素彬永豐人成化進士授程鄉縣令考績赴部老稚  
追攀道左彬曰若等毋慮吾行不出半年耳去未三月鄰  
邑饒平賊發城陷奔屯程鄉彬過家臥病聞之即力疾陸  
趨四日及境為白行軍布政陶魯軍衆邑小乞散之鄰邑  
以紓民困陶擒賊五百餘多濫入者彬力言於巡按御史  
雪脅從者過半九載考績布政劉大夏署云無能事之虛  
名有牧民之實惠後進朝請大夫  
人物志

劉鴻字雲表泰和人成化丁酉舉於鄉兩擬春官第一才名  
達禁中憲宗賜以巾曰遮暘免其家徭役丘文莊濬倪文

毅岳戴恭簡珊皆與為忘分交所居七星坳自號七星居  
士詩文集十二卷  
澱水志林

歐陽旦字子相安福人成化進士授休寧令復二程之祠表  
忠孝之墓累官南京副都御史歷任三十餘年清節始終  
一致弟哲字子履甲辰進士廣東提學僉事才行實相伯

仲云  
林志

劉丙字文煥安福人成化進士為監察御史按歷所至風采  
壁立累官湖廣巡撫時方大營建遷工部侍郎督諸藩采  
運材木竭力區畫令行弊革卒贈南京工部尚書謚恭襄  
人物志

王懋中原名中立字與時安福人成化進士宰南樂累官南  
京右都御史當鎮撫滇南時不避權貴奏免場課數事忌



之者衆遂上疏乞歸宸濠叛懋中倡集義兵告變於巡撫  
王守仁知府伍文定協力討平之乃詔起於家所著有心  
遠集 同上

曾望宏泰和人成化進士歷刑部郎中凡諸司掣肘者大司  
寇悉付之曰非曾郎中不可有駙馬奏爭民田望宏廉得  
其實悉歸之民又出誣執左道百餘勘中貴官與皇親互  
訐事各斂服尋擢知常州至則表節義抑強豪勸農造士  
政治卓然有聲 同上

龍伯泰和人成化進士知慈谿縣恤民勵俗葺先賢祠宇雪  
理沉冤禱雨龍見 林志

劉孟字子賢安福人成化進士歷諫垣十五年剛直敢言嘗  
劾文武官不職者五十六人皆罷之壽寧侯壻錢銘怙寵

滋惡孟具疏直糾寘於法復請罷鎮守太監免爲地方之  
害疏勘三大營互爭接壤民田九百頃爲草場歸之民陞  
福建左叅政平白水峒劇寇陞僉都御史撫延綏逆瑾責  
賂逮獄濱死廷臣相率申救罷歸 人物志

徐穆字舜和吉水人弘治進士授翰林編修分校會試名士  
多出其門充正使頒詔朝鮮穆至正迎見之儀拒饋獻遠  
人畏服逆瑾惡不已附調南京兵部員外瑾誅還職進侍  
讀學士而卒 林志

周魯字純夫吉水人弘治進士授監察御史糾彈不避時有  
以司馬遷冢宰者十三道以爲不可欲言之而無肯當先  
者魯曰言官畏言耶即首署其名冢宰憾之後與都御史  
論差法不合遂乞休去 同上



趙璜字廷實安福人少從父之官墜江中不死弘治進士授工部主事改兵部歷員外郎出爲濟南知府豪猾吏舞文璜擇愿民教之律令得二十餘人逐吏而代之漢庶人牧場故是海豐民田德王府復爭之璜勘還之民閱七年政績大著正德初擢順天府丞未上劉瑾惡璜坐巡撫朱欽事逮下詔獄除名瑾誅復職遷右僉都御史巡撫宣府尋調山東曲阜爲賊破林廟在曠野璜請移縣就闕里從之擢工部右侍郎總理河道改理畿輔世宗即位進左侍郎陞尚書劉瑾創元明宮糜財數十萬瑾死奸人獻爲皇莊帝即位斥以予民旣而中旨令仍舊璜言詔下數月而忽更示天下不信帝即報許三年與廷臣伏闕爭大禮顯陵司香內官言陵制狹小請改營視天壽山諸陵璜言陵制

與山水相稱難槩同帝納其言已帝欲遷顯陵璜不可乃寢爲尚書六年初值更化帝銳意釐剔中官不敢撓故得舉其職後論執不已諸權倖嫉者衆帝意亦寢疏璜素與秦金齊名考察自陳與金俱致仕馳驛給夫廩如故事璜有幹局多智慮事焚錯他人相顧愕眙璜立辦旣去人爭薦之召復故官未上卒贈太子太保諡莊靖

明史藁

羅璞字宗溫吉水人弘治鄉舉授紹興府同知出已意創造歸衛歸姓二冊當道善之下其法於列郡知思南府平苗賊米魯等有功擢貴州叅政致仕歸

人物志

王思字宜學泰和人太保直曾孫也正德進士改庶吉士授編修九年乾清宮災應詔上疏謂勿以遇災而懼災過而弛庶可享天心保天命其年九月帝狎虎而傷閱月不視



朝思又上封事謫潮州三河驛丞王守仁講學贛州思從之遊及守仁討宸濠檄思贊軍議世宗嗣位復故官充經筵講官時張璁桂萼方獻夫爲學士思羞與同列疏乞罷歸不許其年七月偕廷臣伏左順門哭諫帝大怒繫之詔獄杖三十踰旬再杖之與同官王相給事中張原等十七人皆病創先後卒隆慶初贈右諭德

明史藁

戴冠字仲鷗吉水人正德進士授戶部主事憂國用不足由於冗食遂慨然論列疏略云人主貴藏富於天下比年逆瑾所籍財產不歸之有司而貯之豹房遂創新庫夫供御之物內有監局外有部司不知此庫何所用之疏入上大怒貶烏石驛丞嘉靖改元起於家仕至提學副使

吉州人

文紀畧

劉玉字咸粟萬安人弘治進士授輝縣知縣發粟賑饑奏蠲虛稅復業者千家擢御史初孫伯堅金琦王寧皆以傳奉得官已又以指揮胡震爲都指揮玉抗疏言傳奉不已繼之內批大累聖德乞皆罷之不納武宗即位甫四月災異迭見玉陳修省六事劉健謝遷罷玉馳疏言劉瑾等佞倖小臣巧戲弄投陛下一笑顧讒邪而棄輔臣此亂危所自起乞置瑾等於理仍留健遷輔政不報遂引疾歸後瑾榜玉奸黨復誣構之罰輸粟塞下者三最後逮繫詔獄削籍放歸瑾誅起河南僉事遷福建副使召爲大理少卿擢南京右僉都御史提督江防宸濠反攻安慶玉以舟師赴援事定改撫鄖陽世宗即位進右副都御史歷刑部左右侍郎初偕九卿爭與獻帝不宜稱皇又偕廷臣伏闕哭爭以



大臣不罪六年秋坐李福達獄削籍卒於家玉所居僅庇  
風雨天文地理兵制刑律皆有論著隆慶初贈刑部尚書  
謚端毅子慤南京工部右侍郎歷官亦有聲

明史藁

鄒賢字恢才安福人弘治進士授南京大理評事數有條奏  
時頗稱之歷官福建僉事擒殺武平賊渠黃友勝以疾歸  
家居孝友喪祭一循禮制

同上

按鄒賢即文莊公守益之父史無專傳事見文莊傳首  
羅僑字維升吉水人受業張元禎講學里中弘治進士除新  
會知縣有惠愛正德初入為大理評事京師旱霾上疏曰  
臣聞人道理則陰陽和政事失則災沴作願陛下慎逸遊  
屏玩好放棄小人召還舊德與在廷臣工宵旰圖治并勅  
法官慎守成律即有律輕情重者亦必奏請裁決毋擅有

輕重庶可上弭天變下收人心時朝士久以言為諱僑疏  
上自揣必死輿櫬待命劉瑾果大怒欲抵極刑降中旨詰  
責數百言令廷臣議罪大學士李東陽力救得改原籍教  
官其秋瑾敗尋召復官引病去宸濠反王守仁起兵吉安  
僑首赴義世宗即位即家授台州知府建忠節祠祀方孝  
孺詢民間疾苦歲時循行阡陌課農桑講明冠婚喪祭禮  
境內大治擢廣東左叅政上疏引年竟歸撫按並請留吏  
部又牒趣不得已之官踰年遂謝病去

同上

羅欽順字允升泰和人弘治進士及第授編修遷南京國子  
監司業與祭酒章懋以實行教士未幾奉親歸因乞終養  
劉瑾怒奪職為民瑾誅復官上獻納愚忠疏不報遷南京  
太常少卿再遷南京吏部右侍郎入為吏部左侍郎世宗



西江志 卷之十八  
即位命攝尚書事上疏言久任超遷法當疏通不報大禮  
議起欽順請慎大禮以全聖孝亦不報遷南京吏部尚書  
省親乞歸起禮部尚書辭又改吏部尚書下詔敦促再辭  
許致仕有司給祿米時張璉桂萼以議禮驟貴秉政樹黨  
屏逐正人欽順恥與同列故屢詔不起里居二十餘年日  
居學古樓潛心格物致知之學專力於窮理存心知性初  
由釋氏入既悟其非乃力排之爲著困知記自號整菴年  
八十三卒贈太子太保謚文莊同上

按是時文成之教盛行江右士大夫之高明者羣起而  
尊師說獨羅文莊書尺往復辨晰幾數千言蓋文莊矯  
釋氏之空寂文成破俗儒之支離各有指歸亦如朱陸  
同時所見不必盡同也後學不察乃至自立門戶紛紛

聚訟夫豈兩先生立教之初心乎又按先生所著有整  
菴存藁續藁

黃黎洲曰先生之學始從庭前柏樹子話頭得悟一夕  
披衣通身汗下自怪其所得之易反而求之儒不合也  
始知佛氏以覺爲性以心爲本非吾儒窮理盡性至命  
之旨乃本程朱格致之說而求之積二十年始有見於  
所謂性與天道之端一口打并則曰性命之妙理一分  
殊而已矣又申言之曰此理在心目間由本而知未萬  
象紛紜而不亂自末而歸本一真湛寂而無餘因以自  
附於卓爾之見如此亦可謂苦且難矣

陳鳳梧字文鳴泰和人弘治進士授刑部主事清寧宮災應  
詔言時政奉命江南審錄重囚多所平反出爲湖廣提學



僉事推行聖制爲十八條刊示郡縣歷陞山東左布政使  
卒贈工部尚書著有奏議修辭錄毛詩集解困知記

人物志

彭龍龍泉人弘治鄉舉授東昌判時馬政久敝馬戶率多流  
散龍至條奏馬政五事極言俵馬責駒均役安民之方下  
其議行之

同上

蕭乾元字必克萬安人弘治進士爲御史上疏數宦官劉瑾  
等奸狀忤旨廷杖幾死瑾誅起福建兵備僉事寢建寧軍  
士之變正建安匿喪之罪陞雲南副使尋引疾去

同上

劉潮字主信安福人弘治進士授大理評事歷廣西按察副  
使平賓州八寨劇盜有功先是宸濠殺長史莊典妻子無  
所歸潮買地居之時宸濠威制豫章道路以目或危之潮

不爲動

府志

劉子厲安福人弘治進士授嘉善令入爲監察御史逆瑾執  
柄斥不附已誣逮下獄落職瑾敗起按福建尋卒

人物志

羅欽德字允迪泰和人與弟欽忠同登弘治己未進士其時  
兄欽順官翰林三羅之名隱隱在公卿間咸欲識其爲人  
欽德深避不欲接款遂除外任有清名中涓豪猾聞風斂  
跡性孝友得請歸侍父几杖依依若孺子狀其母所製布  
履易簣時命納諸棺以殉

豫章書

按欽忠歷官副都御史詳見羅整菴存藁墓志

彭杰字景俊吉水人弘治進士歷四川叅政督餉討熨寇師  
捷宣慰使冉儀所部縱掠且叛杰諭定之陞雲南湖廣布  
政使二省鹽法宗祿多羨餘人咸藉以自利杰一無所取



黔國沐紹勛禮絕方岳杰與之分庭相抗武定侯郭勛鎮楚藩臬不敢馳中道杰奪門而入其剛勁多類此 吉州人文紀畧

劉昭字仲賢廬陵人弘治進士正德末宸濠叛王守仁起兵進討過吉州與郡守伍文定延昭入幕與叅謀議宸濠伏誅錄昭功力辭不受守仁貽書曰東征之役執事贊襄之力居多而絕口不肯言功豈常人所能著有東崖傳東征

忠義錄 豫章書

羅善字復之安福人弘治進士為諸生時有從游者必告以孝弟廉恥為基址基址不堅雖富貴終且傾仆歷官陝西僉事會逆瑾葬其父馬嵬坡下過者率致祭祭必以文達瑾善獨不顧而去既歸月朔望必正衣冠率子姓會中堂

講小學數條且考論月中臧否叱罰其不率教者

豫章書

李勲字功大吉水人以歲貢上禮部授新野訓導時河南大饑流移載道令不能救勲捐粥賑之多所全活陞淮王右長史王禮意稍衰遂棄官歸 人物志

劉教字道夫安福人弘治鄉舉歷刑部主事知梧州丁繼母憂服闋遂不仕在刑曹時貴溪夏言分宜嚴嵩柄政既同鄉又於分宜為年友引嫌不往見值巨璫子弟殺人同官疑憚不為訊教論如法告致歸田與周羅山祿陳蒙山家謨訂西原惜陰之會著有蒼梧芝亭藁 同上

曾直字叔温吉水人弘治進士歷知鄞新城二縣擢工部主事調刑部陞郎中忤大闡張銳引疾去嘉靖初用薦起知肇慶府累官大理少卿都御史彭澤將復哈密為中人所



構下獄直判以誣忠勤大臣法在必誅土魯番復賄內外以計逐直遂再乞歸入仕二十六年履危陷險略不顧惜性喜讀書自經史至於星曆地理譜牒咸有著論所著凡十餘種卒年八十餘

石蓮集

按曾直事人物志不載詳見羅文恭所撰墓志今采入羅循字遵道吉水人弘治進士歷武選郎中會考選武職有指揮二十餘人素出劉瑾門循罷其管事瑾怒罵尚書王敞敞謝曰郎中輩為之又罵曰不能制郎中安用尚書敞益懼歸部趣易奏循退遲之數日而瑾敗敞乃謝循歷知鎮江淮安二府陞徐州兵備副使咸有聲

明史藁

按羅循事明史見羅洪先傳首分省人物考所載與此不同今從史

甘公亮字欽采永新人正德進士授兵部主事上疏乞改南便養在刑曹讞獄明允爰書成憫悼每形諸色時乾清宮災率同列陳八事雖未行士論壯之出守惠州罷橋鐵稅攻破賊巢奏設和平縣州賴以寧公亮生平為學沉潛義理而以孝友力踐為宗有懷金求銘者亮察知其人曰吾雖貧不能為人諛墓也

豫章書

蕭晚字啓旦吉水人正德進士授南刑部主事以持法律忤近貴而大闢高隆不勝忿誣奏晚待理久之尚書李承勳為白其冤得免累官至布政使

人物志

劉廷簞字器重安福人正德進士知杞縣入為御史歷按兩浙閩貴行部郡邑單車徑往州長吏而下咸敬憚之

同上

李宗棻字敬甫安福人七歲時與羣兒戲父怒取紙幅畫為



百空格跪之祠下責之曰汝不願則遣汝農願則書願字  
百棊乃蒲伏握筆作九十九字而書其尾曰學未就不敢  
盡書遂自勵於學扁其室曰寤室容止食息必以古聖賢  
爲則性尤孝動循古禮服勤浣濯必勞力不敢委人日有  
錄自考其心之隱微

分省人物考

李中字子庸吉水人正德進士楊一清爲吏部數召中應言  
官試不赴及授工部主事武宗自稱大慶法王建寺西華  
門內用番僧住持廷臣莫敢言中拜官三月即抗疏請毀  
佛寺出番僧妙選儒臣朝夕勸講攬大權以絕天下之奸  
建儲位以立天下之本革義子以正天下之名則所謂振  
紀綱勵風俗進君子退小人諸事可次第舉矣帝怒罪且  
不測以大臣救得免踰日中旨謫廣東通衢驛丞王守仁

撫贛州檄中叅其軍事預平宸濠世宗踐祚復故官未任  
擢廣東僉事再遷廣西提學副使三遷廣東右布政使十  
八年以右僉都御史巡撫山東歲歉令民捕蝗者倍予穀  
蝗絕而飢者濟進副都御史總督南京糧儲卒光宗時追  
謚莊介少聞道於同里楊珠旣而擴充之沉潛邃密學者  
稱谷平先生門人羅洪先王龜年周子恭皆能傳其學中  
族人楷又傳洪先之學楷字邦正由舉人授湯溪知縣母  
艱服闋補青田時倭躡東南楷積穀資守禦青田故無城  
倭至楷禦於沙埠倭不得渡乃以間築城倭又至登陴守  
日殺賊數人倭遁去改知昌樂亦以治行聞

明史藁

鄒守益字謙之安福人正德六年會試第一出王守仁門廷  
對第三授翰林院編修踰年告歸謁守仁講學於贛州宸



濠反與守仁軍事世宗即位始赴官嘉靖三年二月帝欲去興獻帝本生之稱守益疏諫忤旨被責踰月復上疏帝大怒下詔獄考掠謫廣德州判官建福初書院與學者講授其間稍遷南京禮部郎中考滿入都即引疾歸久之以薦起南京吏部郎中召為司經局洗馬遷太常少卿兼侍讀學士出掌南京翰林院尋改祭酒九廟災守益陳上下交修之道言殷中宗高宗反歿為祥享國長久帝大怒落職歸日事講學學者稱東廓先生家居二十餘年卒隆慶初贈南京禮部右侍郎謚文莊子善嘉靖進士以刑部員外郎恤刑湖廣矜釋甚衆擢山東提學僉事時與諸生講學萬曆初累官廣東右布政使謝病歸久之以薦即家授太常卿致仕子德涵德溥同上

黃黎洲曰鄧文潔公稱陽明必為聖學無疑及門之士槩多矛盾其說而獨有取於念菴然何獨近遺東廓耶東廓以獨知為良知以戒懼謹獨為致良知之功此是師門本旨而學焉者失之浸流入猖狂一路惟東廓斤斤以自體之卓然守矩無少畔援諸所論著皆不落他人訓詁良知窠臼陽明之教卒賴以不敝可謂有功師門矣

歐陽重字子重廬陵人正德三年殿試對策歷詆闕政讀卷者置之二甲授刑部主事劉瑾兄死百官往弔重不往張銳錢寧掌廠衛連構縉紳獄重出死力與爭銳等假他事繫之獄贖杖還職再遷郎中歷四川雲南提學副使遷浙江按察使未上拜右僉都御史巡撫應天會尋甸土酋安



銓鳳朝文反廷議以重諳滇事乃改雲南賊平重推功於前撫臣傅習重及黔國公沐紹勛鎮守太監杜唐等緬甸木邦隴川孟密孟養諸酋相讐殺各訐奏於朝下重等勘覆遣叅政王汝舟知府嚴時泰等徧歷諸蠻譬以禍福皆還侵地其貢如故重列善後數事悉報可賜璽書褒諭雲南歲貢金千兩費不貲大理太和蒼山產奇石鎮守中貴遣軍匠攻鑿山崩壓死無筭重皆疏論浮費大省山得永閉當是時唐與紹勛相比爲奸利長吏不敢問羣盜由此起重極言鎮守中官宜革帝頗納其言下詔勅紹勛命唐還京待勘二人懼且怒遣人賄張璉謀去重竟罷歸黜爲民家居二十餘年言者屢薦竟不復召

同上

按歐陽重事詳載羅念菴所撰墓志中今據史傳節錄

劉泉字應占安福人正德進士選庶吉士陞編修宸濠方畜逆謀泉獨先發其奸激御史蕭淮等劾之世廟繼統疏陳四事遷湖廣叅議即上疏致仕

人物志

李儼字民望永新人正德進士授行人疏諫南巡忤旨杖瀕死調國子學正嘉靖初擢監察御史出按應天人以真御史稱之乞終養遂不復起居鄉倣行藍田鄉約率里人講學務實行不爲虛論卒而祀於社

同上

王學夔字一卿安福人正德進士爲吏部考功郎建言罰跪午門廷杖之嘉靖初上謹始疏又疏抑戚畹宥言官直聲大震歷陞湖廣江南巡撫所至俱有平寇功以兵部尚書致仕家居存問者再卒贈太子少保諡莊簡

府志

王時柯字敷英萬安人正德進士授行人嘉靖三年擢御史



疏言桂萼輩以議禮迎合博陞美官薛蕙陳相段續胡侍  
等連章論劾實出至公今佞人超遷而羣賢獲罪恐海內  
聞之謂陛下好諛惡直願采忠讜之言消朋比之禍特寬  
蕙等而聽席書方獻夫辭職除張璫桂萼別任則是非不  
謬人情悅服忤旨切責未幾有伏闕之事再予杖除名穆  
宗即位贈光祿少卿

明史藁

劉魁字煥吾泰和人正德中登鄉薦受業王守仁之門嘉靖  
初謁選得寶慶府通判歷潮州府同知入爲工部員外郎  
疏陳安攘十事帝嘉納二十一年秋帝用方士陶仲文言  
建祐國康民雷殿於太液池西所司希帝意務宏侈程工  
峻急魁欲諫度必得重禍先命家人鬻棺以待遂上章曰  
頃泰享殿大高元殿諸工尚未告竣內帑所積幾何歲入

幾何一役之費動至億萬土木衣文繡匠作班朱紫道流  
所居擬於宮禁國用已耗民力已竭而復爲此不經無益  
之事非所以示天下後世帝震怒杖於廷錮之詔獄時御  
史楊爵先已逮繫旣而給事中周怡繼至三人屢瀕死講  
誦不輟繫四年得釋未幾復追逮之魁未抵家緹騎已先  
至繫其弟以行魁在道聞之趣就獄復與爵怡同繫又三  
年與爵怡同釋尋卒隆慶初贈卹如制

同上

按人物志訛以魁爲萬曆鄉薦今改正所著有晴川集  
仁恩錄今不傳學案載其在獄與楊斛山周納溪講學  
凡四年世宗齋醮有神降箕爲三人頌寃改釋而復逮  
又二年高元殿災上復聞火中呼三人名氏乃放還家  
事雖近誕然忠義之士固宜爲鬼神陰佑也



歐陽鐸字崇道泰和人正德進士授行人上書極論時政不報歷工部郎中改南兵部出爲延平知府毀淫祠數十百所以其材葺學宮司理太監蕭敬家奴殺人立置之辟擢廣東提學副使累遷南京光祿卿歷右副都御史巡撫應天十府蘇松田不甚相懸下者畝五升上者至二十倍鐸令賦最重者減耗米派輕齊最輕者徵本色增耗米陰輕重之賦乃均諸州縣荒田四千四百餘頃歲勒民償賦鐸以所清漏賦及他奇羨補之議徭役及裁郵置費凡數十百條民皆稱便遷南京兵部侍郎進吏部右侍郎九廟災自陳去鐸有文學內行修潔仕雖通顯家具蕭然卒贈工部尚書諡恭簡

同上

夏尚朴字敦夫永豐人從學於婁一齋諒登正德進士歷部

屬守惠州山東提學道至南京太僕少卿逆瑾擅政遂歸

明儒學案

劉翀永豐人正德進士官郎中廉靜謙約尋告病歸寓居金斗寺甘貧嗜學始終不改其操

人物志

周尚化泰和人正德進士知邳州時流賊猖獗尚化預築土城捍禦之賊旣逼州議者欲闔門固守尚化曰城外非吾民耶乃合城內外居民諭之以義誓共死守賊乃解去陞南刑部員外以憂去

同上

周煦字啓和安福人少孤母許氏年十九厲節孀居煦弱冠領鄉試而母卒及登進士第即自疏母節於朝詔旌其門授行人陞御史巡按雲貴適土寇犯順雲南巡撫闕煦檄總鎮三司指畫方略討平之事聞壘書獎勵歷都察院右



副都御史卒於官

分省人物考

樂鑣字景隆自號雲樵山人正德中諸生與同郡鄒東廓聶雙江講求良知之學時年五十餘矣雅好古文尤長於詩

大拙堂集

按樂鑣志書皆不載今采楊武東載鳴所撰壙志增入

賀鈞字信夫廬陵人正德鄉舉居親喪家人失火鈞亟取累世神主奔出他貲一無所問除應天教授日與諸生講學必依於孝弟忠信所著有龍岡摘藁子涇成進士官至廣西按察副使解組歸執贄布衣劉文敏之門

人物志

尹袞字舜章永新人正德鄉舉授壽寧令召父老牖以至誠作詩歌戶給之遷守綿州公署垣壞得窖金數萬兩禁家衆弗得取登記其數以當歲賦餘以葺城堞人稱其廉

府

志

彭簪字世望安福人正德鄉舉為衡山令十年多惠政移倅常州專務大體攝篆宜興却例供百金或以為病後來者簪曰後令賢必不予非不然吾亦安能以其身預為不賢者地改知靖州一月拂袖歸自稱石屋山人與同郡羅洪先鄒守益日以正學相切劘郡邑長吏部使者莫不式廬請事居十二年自為傳志祭文邀同志作別乃沐浴端坐而逝

人物志

聶豹字文蔚永豐人正德進士除華亭知縣召拜御史出為蘇州知府憂歸補平陽知府山西頻中寇民無寧居豹令富民出錢罪疑者贖得萬餘金修郭家溝冷泉靈石諸關隘練鄉勇六千守之寇來犯被却由是廷議以豹為知兵



擢陝西副使備兵潼關大計拾遺言官論豹在平陽乾沒  
逮下詔獄落職歸嘉靖二十九年秋都城被寇禮部尚書  
徐階豹知華亭時所取士也言其才可大用立召拜右僉  
都御史巡撫順天未赴擢兵部侍郎尋陞尚書京師外城  
成進太子少傅是時西北邊歲遭寇東南倭又起羽書日  
數至豹本無應變才而大學士嵩與豹鄉里徐階亦入政  
府故豹甚為帝所倚久之寇患日棘卒無所謀畫條奏皆  
虛文帝漸知其短降俸二級頃之竟以中旨罷而用楊博  
代之歸數年卒隆慶初贈少保謚貞襄豹初好王守仁良  
知之說與辨難益心服後聞守仁歿為位而哭以弟子自  
處及繫獄著困辨錄於守仁說頗有異同云

明史藁

按聶雙江立朝本末據識小錄識餘錄人物考學案所

載不無異同今以明史為斷所著尚有雙江集致知議  
略良知辨諸書史傳失載

劉文敏字宜充安福人自幼朴實不知世有機械事已讀傳  
習錄而好之乃入越稟學操存克治一息不少懈不應科  
舉華亭為學使以貢士徵之不起凡所言論與聶雙江相  
視莫逆人謂雙江得先生而不傷孤另年八十三卒

明儒  
學案

按兩峰以處士遊文成之門所著有論學要語百餘篇  
王時槐陳嘉謨賀涇皆門弟子也明史附載聶淵傳後  
頗不詳今從學案

劉秉鑑字遵教宣子正德進士累官刑部員外郎歷大名兵  
備副使以忤巨奄逮繫謫判韶州量移潮州同知知臨安



府初學於甘泉九篤志於陽明之學沒時年未及五十同

上

張鼇山安福人正德進士擢御史請建儲諫迎佛論巡山海關章數十皆經國遠猷督學南畿作人稱盛內艱歸適寧濠變從王守仁勤王凡檄奏文移多所草創

人物志

毛伯溫字汝厲吉水人正德進士授紹興府推官擢御史嘉靖初遷大理寺丞擢右僉都御史巡撫寧夏改理院事爲趙府宗人祐棂所訐解官候勘已復褫職十五年冬起右都御史會安南世孫黎寧遣陪臣鄭惟僚等懇莫登庸弒逆請興師復讐帝疑其不實命暫緩師而遷伯溫工部尚書帝幸承天詔總督宣大山西軍務大同等五堡相距二百餘里自巡撫張文錦以築堡致亂後無敢議修者伯溫

曰變所由生以任用匪人非建議謬也卒營之邊防賴焉時莫登庸數上表乞降下廷議撫剿之宜咸言當討帝從之命伯溫與咸寧侯仇鸞南征伯溫等至廣西部署已定會鸞有罪召還伯溫進駐南寧懸重賞購登庸父子登庸懼遣使乞降伯溫承制許之登庸率從子文明及部酋四十餘人皆素衣繫組於頸至關南俟命伯溫傳令啓關登庸等跣足膝行北面稽首上降表伯溫宣天子恩威納其圖籍并所還欽州四峒地權令還國聽命馳疏以聞帝大悅詔改安南國爲安南都統使司伯溫受命歲餘不發一矢而安南定由帝本不欲用兵故也論功加太子太保還朝復理院事張瓚卒伯溫代爲兵部議上防邊二十四事軍令一新又上冗濫當革者二十餘條凡錦衣騰驤諸衛



御馬尚膳諸監素為中貴盤踞者盡在革中帝稱善立命清汰左右近習多不悅二十三年秋順天巡撫朱方以防秋畢請撤客兵未幾寇大入逼畿輔帝震怒并削伯温籍伯温歸疽發背卒穆宗立復官賜卹天啓初追謚襄懋明史藁

按伯温所著名東塘集今傳者止平南錄一卷詩選一卷奏議二卷而已

龍光字冲虚吉水人由掾為縣丞致仕正德丁丑王伯安開府虔南日與士人談學光子履祥將往光不許履祥泣請不得已許之數月歸循循如處子光喜曰吾乃今知王先生因履祥以見執弟子禮先生悅之留為叅謀會宸濠反光集田僮百十人以從出入帷幄密受方略濠既擒嘉靖

初論功賞授直隸滁州判官老於家年八十五卒 豫章書

按龍光事人物志吉安府志俱不載當文成平濠時光實效叅謀之力觀文成與公卿書云致仕縣丞龍光等或詐為兵檄以撓其進止或偽書反間以離其腹心陰謀秘計有諸將士所不與知云云推獎若此修志者詎可因其官小而沒之耶

尹襄字舜弼永新人舉鄉試第一正德進士歷陞侍講進司經局洗馬每值經筵意存諷諫一日進講尚書說命至官不及私昵有旨問講章誰為者人交屬之襄不為動性醇茂事兄袞尤謹家問起居未敢草一字卒年四十三所著有巽風藁 人物志



西江志卷第七十八



